

PAGKAULAW



Salamat, Igsoong Neville. Panalanginan ka!

Maayong buntag, mga higala. Pagkaanindot nga maania dinhi niining buntaga. Ug sa hunahuna ko nakahimo ako og . . . nakalapas ako sa oras ni Igsoong Neville. Naglingkod siya kaganina dinha sa luyo uban sa iyang, nga nagaandam para sa iyang teksto; ug tungod misulod na man ko, gipilo na lang niya ang iyang teksto, ug miingon, “Bueno . . .”

² Nagpahinumdom kini kanako sa pipila na ka tuig ang milabay. Adunay usa ka itum nga igsoong lalaki kaniadto dinhi, nga ginganla’g Igsoong Smith, ug si Igsoong babayeng Cross pud. Suud ko kaayo sila nga mga higala. Ug pagmosulod na ako sa bilding inig kagabii, ang maong tigulang lalaki . . . Aduna siya’y puti nga bigote. Wala ko kabalo kung aduna pa ba kaninyo ang nakahinumdom kaniya, o wala na. Ug pag-anaa siya sa entablado, kabalo na mo. Ug silang tanan magakanta og, “It’s A Highway To Heaven.” Ug si Igsoong Smith, nagalingkod lang siya nga ingon *niini*, kabalo na mo. Ug mosulod ako diha sa luyo nga pultahan.

³ Adunay usa pud ka batan-ong babaye, nga medyo itumon, nagalingkod siya kaniadto diha sa daplin. Sugdan niya sa pagpakpak ang iyang mga kamot, nga moingon, “Lift Him up,” sa nianang maong kanta, kabalo na mo. Aduna sila og kaugalingon nilang tono niini, kabalo na mo. Ug dayon dinha sa pikas daplin, adunay uban pa, nga moingon, ginabalik-balik ang, “Lift Him up.” Bueno, ingon niana ang ginakanta nila pagmosulod na ko sa pultahan. Gihigugma ko gayud kadto nga pundok sa mga tawo.

⁴ Ug dayon molingkod ang tigulang nga si Igsoong Smith dinha sa luyo, sa makadiyut, kabalo na mo, ug siya’y medyo hilomon nga matang sa tawo. Moingon siya, “Sulod, elder, ipapahulay ang imong kalo.” Dili nga “ipapahulay ang imong kaugalingon”; “ipapahulay ang imong kalo,” kita n’yo. “Sulod, elder, ipapahulay ang imong kalo.” Dayon motindog siya dinha, ug, sa paagi niya pa lang sa pagsugod kabalo na ko, og naa na siya’y plano nako, kita n’yo.

⁵ Moingon siya, “Bueno,” ang ingon niya, “mga anak, kabalo na mo,” ingon niya, “Ako—nagalingkod ako kaganina dinha nga nagahunahuna, ‘Ginoo, unsa ma’y ihatag Mo kanako nga igasulti?’” Miingon, “Siya—Siya—padayon ra Siyang nagalingolingo sa Iyang ulo, nagalingolingo sa Iyang ulo nganhi kanako. ‘Wala Ko’y ihatag kanimo og unsa man nga igasulti.’” Miingon, ingon niya, “Pagkakita ko kang Elder Branham nga

misulod dinha, ug ingon ko, karon, ‘Ginoo, nahunahunaan ko na . . .’” Bueno, ako diay mismo ang ipawali niya!

⁶ Igsoong George Wright, kumusta ka, igsoon? [Nagaingon si Igsoong Wright, “Oh, maayo man. Oo.”—Ed.] Panalanginan ka, Igsoong Wright! Sigurado. [“Anaa pud si Igsoong Elijah dinha sa likod.”] Oh, tinuud ba? Si Igsoong Elij’ Perry, ingon niya, anaa kono dinha sa likod. Asa man ka, Igsoong Elij’? Dugay ko na siya nga wala makita . . . Bueno, my, grabe! Karon magkaaduna gayud kita og panaghimamat dinhi! Si Elij’ Perry, si George Wright, ug ang uban kanila nga mga karaan na nga kanunay’ng nagatambong dinhi sa kaniadtong halos kinahanglan pa gani nilang pugngan ang mga takop sa bintana, sa ilang mga kamot, pag nagahaguros ang hangin. Pagkaanindot nga makita kamo! Si Nanay’ng, Igsoong babayeng Wright kauban pud nimo? Ania ba si Igsoong babayeng Wright? Anaa siya dinha sa likod, usab. Oo, sir. Bueno, pagkaanindot gayud! Si Igsoong babayeng Perry pud, nakita ko silang tanan karon. Bueno, pagkaanindot niini. Pagkaanindot nga maania dinhi. Pagkaanindot nga molingkod niini nga mga dapit. Pagkaanindot gyud nga magkauban kita.

⁷ Giplanohan ko, gayud, nga makabalik didto; nga may kabug-aton sa kasingkasing ko. Bag-ohay pa lang kong nakabalik gikan sa Africa, ingon nga nakahibalo na mo. Ug sa pag-abot ko didto, limitado ra man ang akong visa, mao nga wala ako tugoti, wala ako tugoti sa pagwali tungod kay magakatigum kono ang daghan kaayong mga tawo. Nagadahum man gud sila og usa ka rebolusyon didto sa unsa mang orasa, ug—ug wala nila—nila ako tugoti sa pagwali tungod nga magakatigum man ang daghan kaayong mga tawo. Ang bugtong paagi lang nga mahimo ko, mao ang magkaaduna og usa ka organisasyon nga girepresentar sa gobyerno, nga anaa sa gobyerno, nga maoy modapit kanako didto, dayon awtomatiko na nga magpadala ang gobyerno og mga sundalo para sa proteksyon. Kita n’yo, sila gayu’y . . . Magkaaduna man gud og usa ka rebolusyon, ug mao kadto ang rason. Hapit na kadto niadtong tungora, kita n’yo. Miingon ang usa ka opisyaales sa gobyerno, “Sa niadtong miaging higayon nga ania siya dinhi, halos ikaupat nga bahin sa usa ka milyon ka mga tawo ang nagkatigum.” Ug ingon pa niya, “Busa, nakita n’yo, mahimong mao ra kana ang mismong ginapaabot sa komunismo, para sa usa ka rebolusyon.” Busa, dili gyud ko makawali.

⁸ Nanagtindog kadtong mga tawo didto, ginawara-wara ang ilang mga kamot, ug nanagsinggit, “Hinumdumi ang akong inahan! Hinumdumi, ang igsoon kong lalaki nga namatay! Ang akong . . .” Atua sila, luyo sa mga koral, kabalo mo, sa mga koral nga alambre, ug makapasubo gayud kanimo kadto. Ug mipauli na ko.

⁹ Ug nahunahunaan ko, “Bueno . . .” Ang anak ko, nga si Joseph, pagbalik ko, medyo napasagdan na niya ang iyang

pagbasa. Ug siya’y . . . Nakapasar na man siya, apan kinahanglan niyang ipapadayon kini; dili pa man gud siya maayo kaayong mobasa. Busa nahunahunaan ko, “Bueno, medyo kinahanglan usa’ namong mopabilin sa balay.” Ug ingon ko, “Kung mopabilin pud kami sa balay, basin masayang na hinoon ang bakasyon sa mga bata.” Busa amo na lang kining giirrog sa ubang panahon, ug iusog na lang kini ngadto sa laing bahin sa Agosto, ug dayon . . . ug mobalik na lang dinhi sulod sa duha, tulo ka semana.

¹⁰ Ingon ko, “Nagtoo ko, samtang ania kita dinhi, mag-abang na lang ug magpahigayon ako og usa ka panagtigum. Abangan nato kanang awditoryum sa eskwelahan dinhi, ug—ug magpahigayon kita og panagtigum sugod sa ikabaynte-otso hangtud sa ika-uno, usa ka panagtigum didto sa awditoryum sa eskwelahan. Gusto ko nga iwali ang hilisgotanan mahitugod sa pagbubo niining pito ka katapusang Mga Panaksan.” Ug busa gitawgan una namo, ug medyo napalaw kami. Dili na man diay nila kami tugotan nga gamiton kining mga eskwelahan, daghan unta kaayo nga mga tawo ang mapasigo didto. Dili pud namo puedeng ipahigayon kini sa bisan asa. Ug mao nga nakadesisyon ko, samtang ania ako dinhi, imbis nga . . .

¹¹ Dili man nato mahimong mapasulod ang tanang mga tawo, kung atong ipahi- . . . Wala pa gayud kini napahibalo, gani. Busa kung pasudlon nato ang tanang mga tawo, paningkamotan nga mapasulod gyud sila sa tabernakulo dinhi, dili nato mamahimo kana. Kita n’yo, kini lang . . . malisud na gani ang lima ka adlaw dinhi.

¹² Busa, sa nagalingkod ako dinha nga nagapakig-istorya kang Igsoong Neville ug Igsoong Wood, ug kanila, nakadesisyon kami nga buhaton ang ingon-niini. Kung dili gyud nato mamahimo, imbis, nga magkaaduna unta kita og lima ka panerbisyo; kana’y sa ikabaynte-otso, ikabaynte-nuebe, ika-traynta, ikatrayntay-uno, ug sa uno. Bueno, sa hunahuna ko kung magkaaduna na lang kaha kita, sugod sa sunod Dominggo, mahimo nga magkaaduna kita og duha ka panerbisyo, sa Dominggo sa buntag ug Dominggo sa gabii, mao kana’y sa ikadise-otso. Ug pagkahuman sa—sa ikabaynte-singko, magkaaduna kita og panerbisyo sa Dominggo sa buntag ug Dominggo sa gabii. Upat na kana ka mga panerbisyo. Dayon sa ika-uno sa Agosto, magkaaduna na pud kita og panerbisyo sa Dominggo sa buntag ug Dominggo sa gabii. Sa ingon-niana magkaaduna na kita og unom ka mga panerbisyo, ug kung ingon-ana man dili na kana magpahinungdan og pagkadasok aron lang nga mapasulod ang mga tawo. Ug ingon-ana ang nahunahunaan ko.

¹³ Dili ba mas maayo kana kay sa nga pasudlon ang tanan nga magkaguot ug magkapunsisok pa hinoon, ug tanan na? Kung ingon-ana para lang kana sa duha ka panerbisyo, nga mahimo natong mapasigo kana, basta magtinabangay lang ang

tanan. Tungod kay sa lima ka gabii, nga dire-diretso, mahimong malisud gyud kini.

¹⁴ Ug buot ko nga magpakigkita sa mga tinugyanan ug sa mga elder dinhi, samtang ania ako dinhi.

¹⁵ Nagakahitabo na kini sa bisan asa. Nagapuyo na kita sa niining kaulahiang mga adlaw, kon diin ang Ebanghelyo wala—wala na’y pagkalabaw nga kinahanglan unta nga aduna Kini. Wala na Kini’y mga katungod nga kinahanglan unta nga aduna Kini. Bug-os na kining gihilambigit sa pulitika ug sa ingon-anang mga butang, ug mora’g nahiusa na kini dinha. Ug ingon niana gyud ang mapaingnan niini sa katapusan, tungod kay ang marka sa mapintas nga mananap kinahanglan nga mahitabo pinaagi sa pagkahiusa, nasayod na kita. Busa kita—kita. . . Tungod kay, usa kini ka pagboykot, “walay tawo ang makapamalit o makapamaligya, gawas kaniya nga adunay marka sa mapintas nga mananap.”

¹⁶ Ug karon gusto kong hibaloon, sa mga elder. Mabati kong gipangunahan ako. Wala pa gyud ko sukad nagkaaduna og kauhaw sa akong kasingkasing alang sa Dios, sa tibuok kong kinabuhi, sama sa aduna ako karon, kita n’yo. Tungod. . . Ug gusto kong—kong magkaaduna og kaugalingon kong tolda ug akong—akong mga kahimanan, sama sa gihatag kanako sa Ginoo nga panan-awon, ug nagtoo ko nga ang panahon haduol na gayud karon. Ug gusto kong hibaloon samtang ania ako dinhi, kon nganong dili nato mapahigayon ang maong tolda.

¹⁷ Ug—ug dayon pagmoadto kita, sama sa pag-anhi dinhi sa Jeffersonville, imbis nga magpahigayon og usa ra ka adlaw o duha, o kaha tulo o upat ka adlaw, mahimo kitang moanhi og magtukod niining tolda, ug magpahigayon og duha o tulo ka semana, nakita n’yo, ug wala na’y si kinsa man ang makasulti og bisan unsa mahitungod niini. Mahimo natong gamiton ang usa ka dulaanan sa baseball, o, kung dili man nila kita tugotan nga mogamit niana, aduna man pud og mag-uuma dinhi nga motugot siguro kanato nga magamit ang iyang umahan. Abangan nato ang maong umahan ug—ug tukoran kini og tolda. Ang butang lang nga kinahanglan natong buhaton dinha, mao ang maghimo og atong—atong lahi nga kasilyas, ug uban pa, ug para sa atong mapahimutangan. Ug mahimong dali ra kanang buhaton. Ug pagkahuman sugdan na natong ipahigayon ang atong mga panerbisyo nga ingon niana tungod kay sumala man kana sa panan-awon gikan sa Ginoo, ug kinahanglan nga pagabuhaton kana sa ingon-ana nga paagi.

¹⁸ Ug sa pag-abot ko, kagahapon, ug nahibaloan ko, kabalo na mo, ang *ingon-niini*, *ingon-niana*. Ug sa pag-agi ko sa dalan, ug dihay usa ka buutan kong higala ang miagi pud didto, miingon, “Hello, Billy.” Gitan-aw ko siya, ug ang buhok niya maingon na ka puti sa niebe, og *ingon-ana* na ka daku ang tian. Ug ka-edad

ko ra ang maong tawo. Magkauban kami kaniadto, gwapo nga batan-ong lalaki, kaniadtong bata pa ako. Medyo mipabati kini kanako og talagsaon.

Ang gamay kong bata, nga si Joseph, miingon, “Nganong masulob-on ka, Daddy?”

¹⁹ “Oh,” ingon ko, “Dili ko kini maisaysay kanimo, Joseph. Kita mo, dili ko, dili ko masulti kanimo.”

²⁰ Ug gitan-aw ko si Elij’ Perry nga nagalingkod dinha sa likod, ug si Mrs. Perry pud; daw sa kagahapon itum pa ang buhok sa magtiayon, nga nagapuyo abay sa akong balay, sa aduna pa kami niadtong karaan na nga bangka, nga Wahoo, ug didto sa suba ug nagapangisda kami inig gabii. Makita ko silang duha nga mga puti na ang buhok, kabalo na mo, usa ka butang ang ginaingon niini, usa kini ka gamay’ng hagongan nga nagatingog, “Hamubo na lang imong panahon.” Kita n’yo?

²¹ Busa, gusto ko nga ang matag adlaw sa akong kinabuhi magkaadunay bili Kaniya. Kung unsa ma’y nahibilin kanako, unsa ma’y panahon nga aduna pa kanako, gusto kong igahin kini sa kung asa man nga magabuhat og usa ka butang, bisan kung kini ma’y magatindog sa kanto sa dalan, nga nagapamatuod alang sa kahimayaan ug kadunggan sa Dios. Ug ako—ania ako alang niana nga katuyoan.

²² Ug aduna ko’y usa ka gamay’ng sekreto nga dapit dinhi sa Green’s Mill, Indiana. Dili pa kini usa ka siyudad, sama sa karon, kini’y—usa pa kini ka awaaw. Ug giangkon kini sa ubang mga tawo, ug dili na gani ka nila tugotan nga motamak man lang niini. Apan aduna ko’y usa ka langub didto nga dili gyud siya makakita kanako pagnakasulod na ako didto. Nagaadto pud ko pagpanahon na sa kagabhion, ug dili gyud siya makabalo pagmosulod na ko o pagmogawas na. Ug wala pud siya kabalo kung asa ang maong langub, ug dili gyud siya makasulod niini bisan asa pa kini. Ug gusto kong moadto didto ug makig-istorya sa Ginoo, sa panahon, pagmabati ko nga kinahanglan gyud.

²³ Ang akong asawa, gusto pud niyang moanhi, gusto niyang mobalik ug mobisita, ug si Rebekah pud ug si Sarah, ug sila, uban ang ilang mga higala. Ug mobalik na pud ‘mi dinhi sa sunod nga tulo ka semana, ug kon itugot sa Ginoo.

²⁴ Ug sa hunahuna ko, imbis nga paninguhaong tapokon ang tanang tawo, alang nianang mga panagtigum dinhi sa tabernakulo. . . Siyempre, atoa man kini, iya kini sa Ginoo, og gihatag kanato. Ug naka-aircon kini. Buot ko nga magpahigayon og usa ka panerbisyo sa Domingo sa buntag, usa pud ka panerbisyo sa Domingo sa gabii. Aron makabalik ra ang mga tawo sa ilang mga lugar, dayon mohulat na pud hangtud sa sunod nga semana.

²⁵ Dili ko sigurado kon akong mahisgotan ug—ug opisyal nga maisaysay og maayo ang mahitungod sa pagbubo nianang

katapusang Mga Panaksan, tungod kay ang mga niini aduna gayu'y, grabe ka dakung Mensahe diha niini. Apan mahimo kong maiampo ang mga masakiton, ug buhaton ang mga butang nga... Aduna ko'y mga Mensahe, usab, sumala sa igahatag sa Ginoo nganhi kanako, para sa iglesia. Sa tibuok semana, moadto ako sa kamingawan sa usa ka dapit dinhi ug magtuon, og mobalik ra sa Dominggo sa buntag, magpahigayon og panerbisyo sa Dominggo sa buntag nga sama niini, ug usa pud ka panerbisyo sa Dominggo sa gabii. Ang atong buutan kaayo nga pastor, si Igsoong Neville, gipangutana ko siya kung okey ra ba kana kaniya. Nga gikuha ko na ang tanan niyang mga panerbisyo gikan kaniya, apan mas malipay diay siya nga itugyan ra kini para—para niana. Ako lang. . .

²⁶ Si Igsoong Capps, siya, siguro, nagkaadunay hilanat, usab, ug nakita ko nga milakaw na siya, ug—ug si Igsoong Humes pud. Ug ang Ginoo aduna man pud og Igsoong Mann dinhi nga makapuli dayon, sa maong puwesto. Kabalo mo, dili ba pagkahibulongan niana kung usa mamuhat ang Dios sa mga butang? Kanunay Niyang gikatakda ang tanan-tanan sa tukma gayud. Sa pag-abot ko ug may nadungog kong usa ka tawo nga nagawali. Ingon ko, “Dili kana. . . siguro. . .”

²⁷ Si Igsoong Capps, miadto siya sa Tucson, ug siguro gilayon siyang nabag-ohan didto, tungod mga usa ka gatus ug napulo man gud ang temperatura. Wala gyud siya miangay niadto, mao nga milakaw na pud siya, siya ug si Igsoong Humes, ug miadto sa Phoenix. Siyempre, usa ka gatus ug kinse hangtud dise-sais, dise-otso man didto. Mas grabe pa gani kadto, mao nga siguro miadto na pud siya sa Texas pagkahuman niadto; siya, naningkamot intawon nga makakaplag og usa ka lugar.

²⁸ Apan dili gyud ninyo magustohan ang Arizona niini nga panahon sa tuig, sultihan ko kamo. Usa ka gatus ug kuwarenta, niadtong miaging adlaw, sa miaging Biyernes, usa ka gatus ug kuwarenta ang temperatura, didto sa Parker. Ug didto si Igsoong Craig, nga nagatambong dinhi sa iglesia, nagapuyo. Ug mahimo ka ganing magbuak og usa ka itlog, ug maluto na kini sa dili pa gani mahulog sa yuta. [Mikatawa si Igsoong Branham—Ed.] Ngani, pagmangluwa ka ug—ug mawala dayon ang maong laway, basta. . . Wala gayu'y kaumog ni bisan unsa, usa gayud kini ka hudno niining panahona sa tuig. Apan pag gikan na sa mga Nobyembre, Disyembre ug Enero, maanindot na pud. Pero pagmoabot na pud sa mga Marso ug Abril, mas maayo pang molakaw na lang sá mo kung dili n'yo gustong maglisud og ginhawa.

²⁹ Ug busa si Igsoong Capps ug nahitabo nga miadto sila niadtong panahona, nga sa hunahuna ko mao'y hinungdan nga nanglakaw sila. Ug tingali'g gibuhat pud kadto sa Ginoo alang sa usa ka katuyoan. Nagatoo gyud ko niini, nga gitukod sa Dios ang mga paglakaw sa matarung. Usahay medyo malisud lang.

30 Sama ra niadtong miaging adlaw bahin niining pagbiyahe ngadto sa Africa, sigurado na kaayo ko nga nagabuhat ko diha sa kabubut-on sa Dios. Tungod kay, niadtong miaging tuig, didto ako sa Habagatan, nga nagpahigayon og sunod-sunod nga mga panagtigum, ug, sila—sila, nagdahum ko . . .

31 Gikan niadtong organisasyon, ang ingon, “Mahimo kang moanhi, pinaagi sa Christian Business Men, apan wala kami og unsa man nga kahilambigitan niini.”

32 Bueno, dili pud ko gusto nga dalhon sila nga mga kalalaken-an sa ingon-niana, kabalo na mo, nga mohimo pa hinoon og dili-pagkasinabtanay. Gusto kong—kong maayo ang pagbati nila alang sa usa’g usa. Busa miingon lang ko, “Bueno . . .” Gipadalhan ko sila og sulat, ingon ko, “Hinumdumi, dugay na nga mga katuigan nga gipaninguhaan kong moadto sa Africa, pag-usab, nga nabati kong wala pa natapos ang akong ministerio sa Africa. Wala ako’y . . .”

33 Nganong kinahanglan pa man nako nga moadto sa Africa, sa dihang aduna na man unta ko’y unom, pito ka gatus ka mga siyudad dinhi mismo sa Estados Unidos, nga nagapanawag, kita n’yo, dinhi ra mismo, wala pa’y labot sa Canada, Mexico, o unsa man nianang mga lugara? Nganong gusto ko man gyud nga moadto didto? Tungod nga aduna gyu’y butang sulod sa akong kasingkasing, nga nagabira kanako ngadto sa Africa. Didto, niadto nga mga tawo, may—may sa kung unsang butang mahitungod kanila, nga ako gyu’y gusto, ug gusto kong moadto para lamang sa itum nga mga tawo. Ug may butang pud sa niining kadaghanang, mga tigpamuno, nga sa tan-aw nila dili ko kinahanglan buhaton kana. Gusto ko—ko gayud nga moadto sa itum kong mga higala. Dinha ako gitawag sa Ginoo. Ug karon nanginahanglan sila. Daghan sa mga tawo, sa puti nga mga tawo, nga makahimo ra sa pag-adto og mga doktor ug tanan na. Apan sila nga mga kabus nga mga lumad nga nagapuyo didto, ug halos ut-uton na sila sa ilang balatian. Ako—ako—nabati ko nga mora og sila gayud ang modawat Niini. Sila nga mga tawo. Aduna gyu’y sa kung unsang butang mahitungod niini.

34 Pagmoabot ka sa usa ka punto, nga utokan ka na kaayo ingon nga nahibalo ka na sa tanan-tanan, kung ingon-ana wala na’y bisan unsa pa nga mahimo ang Dios kanimo. Apan kung moabot ka sa usa ka punto nga andam ka na nga maminaw ug makakat-on, nan—kung ingon-ana panahon na kana sa Dios, nga makapanglihok ug makigsulti kanimo.

35 Ug busa gipadalhan ko sila og sulat sa pagtubag, ug giingnan sila. Ug ingon ko, “Hinumdumi, didto sa Adlaw sa Paghukom, kanang maniwang nga mga kamot nga mangab-ot gikan sa aso, nga magahukom kaninyo! Ang ilang dugo mamaanaa kaninyo, wala kanako, tungod kay naningkamot gyud ako sa halos napulo ka tuig nga makabalik.”

³⁶ Dayon sa napadala ko na ang maong sulat, mibalik na ko, og may Butang nga misulti kanako, “Pakigkita kang Sidney Jackson, adto ka para sa usa ka pagpangayam.” Ug, sa mao rang higayon usab, nagpakigsulti ang Ginoo kang Sidney Jackson, miingon, “Leon nga dalag ang buhok sa liog, maga-kamping si Igsoong Branham; sa Durban, may dakung panagtigum.”

³⁷ Bueno, mianhi na siya kaniadto, ug nakigsulti siya kaninyo dinhi. Lain pa’y ako, gibautismohan diay namo. . . Hugot gayud ang pagsupak niya kaniadto niining bautismo sa Ngalan ni Jesus Cristo. Ug ang iyang asawa mas grabe pa gani kay kaniya, gitalikdan niya kini og milakaw palayo. Mahimo mong. . . Sultihan ko kamo, wala pa gayud ko nakakita og ingon ka relihiyosong mga tawo. Aduna sila og halos usa ka gatus ug singkwenta ka mga ministro didto, nga gibautismohan sa Ngalan ni Jesus Cristo, ug gipadilaab gyud nila ang maong nasud. Mikaylap gayud ang Mensahe sa Africa, sa bisan asa, nangadto ang mga piloto ug bantugang mga tawo, og gipangbautismohan sila sa Ngalan ni Jesus Cristo.

³⁸ Ug busa ako, sa dihang moadto na unta ako, sultihan ko kamo, wala pa gyud ko nagkaaduna sukad og ingon ka dakung problema sa tibuok kong kinabuhi, sa pagpaninguha nga makaadto didto. Ug dayon sa mismong ulahi na nga minuto, sa mismong ulahing minuto nga mogikan na unta ko, anaay nakasulat sa akong visa, “Dili puedeng makapahigayon og unsa man nga matang sa pang-relihiyon nga buluhaton; mahimo lamang moadto aron sa pagpangayam.” Bueno, niadtong tungora, malisud gayud.

³⁹ Apan ingon ko, “Dili ko igsapayan kung unsa ma’y buhaton sa yawa, ako—dili ko. . . dili ko makagarantiya sa kung unsay gisulti ni Igsoong Jackson mahitungod sa dalag-og-buhok nga leon, ug sa *ingon-niini*, *ingon-niana*, o sa *uban pa*. Dili ko—ko makagarantiya niana. Apan nasayod ko nga gisultihan ako sa Dios nga ‘pakigkitaan si Sidney Jackson, ug mangayam.’” Ug ingon ko, “Moadto gyud ako.” Ug usahay. . . Ug nagkaaduna ako og usa sa pinakamaanindot nga biyahe nga nahimo ko.

⁴⁰ Nahibaloan ko na kung unsay problema. Ngani siguro, sa Oktubre, kon itugot sa Ginoo, puede na kong mobalik ug makapahigayon og usa ka panagtigum ug tanan na, nga may bug-os na nga kooperasyon, og tanang uban pa, kita n’yo, sa Africa karon. Nasabtan ko na kadto ug nahibaloan kung asa kadto, og kung unsa gyu’y hinungdan niadto. Dinhi, adunay mosulat, kining usa adunay *ingon-niini* nga isulti, ug may usa nga aduna pud og isulti, ug *kining* usa pud dinha. Ang pinakamaayong butang nga buhaton, mao ang hibaloan mo, ikaw mismo. Ug hingsayran ko kung asa ang problema, ug kung unsa gyu’y hinungdan niadto; tungod kadto kay daghan kaayong mga tawo ang magakatigum, og wala ko gitugotan sa gobyerno nga ako ra ang mopahigayon niadto.

41 Karon kung ang Christian Business Men o ang bisan unsa man nga organisasyon, mao'y mipasulod kanamo, kung ingon-ana ang gobyerno awtomatiko nang...tungod kay ang organisasyon man ang garepresentar sa gobyerno, nan magpadala ang gobyerno og mga sundalo para sa proteksyon. Bisan kung aduna pa'y baynte-singko ka mga kalalaken-an gikan sa usa ka denominasyon, baynte-singko gikan sa uban pa, dili gihapon nila dawaton kana. Kinahanglan gyud nga ang—ang pangulo kini sa organisasyon. Ug ang Christian Business Men usa man ka dili pang-sekta nga organisasyon og nagarepresentar sa tanang mga iglesia. Si Doktor Simon, nga mao'y pangulo nila didto, usa ka maayo kaayo nga tawo, nahimamat ko na siya ug naistorya siya. Ug sila na ang bahala sa mga panagtigum, ug makigtigum pud kono ang tanang uban pa nga mga iglesia. Kita n'yo? Ug nagatoo ko nga magkaaduna gyud kita og usa sa pinakadakung mga panagtigum nga napahigayon sukad sa—sa Africa.

42 Apan mao kini ang akong punto, sa dihang nasayod ka nga husto ang ginapaninguhaan mo—mong buhaton, ang unang butang mao ang, kung mabati mong gipangunahan ka nga buhaton ang unsa mang butang, nan susiha kini diha sa Pulong ug hibaloa kung tukma ba kini sa Pulong, ug pagkahuman ayaw tugoting may bisan unsa nga magpahunong kanimo. Dili ko igapayan kung unsa man ka daghan nga mga ligid ang ibalibag sa yawa diha sa dalan, padayon ka lang nga ginapaibabwan kini nga mga babag.

43 Giingnan ko ang akong asawa ug giingnan ko usab si Igsoong Wood, sa pag-abot ko dinhi, ug ang pipila ka mga higala nga akong nahimamat kagahapon: Aduna na ko lima ka tuig dinhi nga halos dili ko kahibalo kung unsa ang angay kong buhaton. Kini'y usa—usa ka makapabalaka...Kita n'yo, ang rebaybal mismo, sa taliwala sa mga kaiglesiahan, patay na. Nasayod ang tanan niana. Mabati n'yo kini sa niini nga tabernakulo. Mabati n'yo kini sa bisan asa. Aduna sa kung unsang pagkahagsa, patay nga pagbati. Aduna gyu'y butang nga dili husto. Kini'y tungod nga ang kadasig sa rebaybal nawala na man sa mga tawo. Adto ka sa mga kasimbahanan, og makita mo sila nga nagapanglingkod ra dinha. Ug ang pastor nagakapuliki kung unsang mensahe ang iyang iwali ug uban pang butang. Ug mahibaloan mo na lang, gitipas niya kini bahin ngadto sa kung unsa nga matang sa pagparty-party ang igapahigayon nila, o ingon niana. Mora og bisan asa na lang kini nga pagkahagsa.

44 Namatikdan na kini ni Billy Graham; ni Oral Roberts. Si Mr. Allen aduna pud gani og pipila ka problema, ingon sa inyo nang nahibaloan. Si Oral Roberts aduna siya'y singkwenta-ka-milyon-ka-dolyares nga mga bilding, ug uban pa, didto. Aduna pud siya'y eskwelahan. Ug, gani, wala man lang ni usa diha sa natad sa pagpang-misyon karon.

⁴⁵ Migikan ako dinhi, tungod sa usa ka panan-awon, nga moadto sa Tucson, aron hibaloon kung unsay gusto sa Ginoo nga ipabuhat kanako. Gihinagbo Niya ako didto, maingon sa gisulti na Niya kaninyo dinhi nga Iya kining pagabuhaton, ug diha sa porma sa pito ka mga Manulonda, ug giingnan ako nga mobalik ako ug pagaablihan na ang Pito ka Mga Selyo. Eksaktong ingon niana ang nahitabo.

⁴⁶ Giingnan Niya, usa niadto ka adlaw si Igsoong Wood sa dihang miadto pud siya didto, miadto kami sa mao ra nga dapit, ug nag-itsa ako og usa ka bato, og sa pagkahulog niini, miingon ang Dios, “Sulod sa usa ka adlaw ug gabii, imong. . .” Ingon niana, nalimtan ko na kung unsa kadtung mga pulong. “Makita mo ang himaya sa Dios.”

⁴⁷ Ug pagkasunod nga adlaw, may usa ka alimpulos nga mipaubos gikan sa kawanangan, ug hingsayran na nato ang sugilanon sa kung unsay nahitabo. Sa dihang nagpaitaas kadto, nangutana sila kung unsa kadto. Ingon ko, “Misulti Kini og tulo ka pulong, sa tulo ka dagkung mga pagbuto.” Nadungog lang sa maong mga lalaki ang mga pagbuto. Nasabtan ko kung unsay gisulti Niini. Ug ang ingon, “Ang Paghukom moabot sa Kasadpang Kabaybayonan!” Duha ka adlaw human niadto, halos maunlod na ang Alaska. Grabeng mga pagdalugdog, mga linog, og tanan na. Tan-awa lang ninyo ang mga niini, sa matag adlaw, gapangtay-og nga mga linog bisan asa.

⁴⁸ Ang ulahi kong panagtigum, sa ulahi ko nga panagtigum, kini pa ang pinakauna kong Mensahe, sa tinuod lang, nga igawali ko sukad niadto. Nagwali ako sa Los Angeles, didto sa Biltmore Auditorium, ug naghigot ako mahitungod sa usa ka lalaki nga nagapili para kaniya og usa ka asawa. Tingali’g aduna na kamo og teyp niini. “Kini’y,” ingon ko, “Nagareplektar kini sa iyang kinaiya ug sa iyang mga pangandoy.” Nga, pagmopili ang usa ka lalaki og usa ka babaye, nagapili siya og usa ka batan-ong babaye, ug aron mamahimo niyang asawa; pagmopili siya, kabalo na mo, og modernong babaye nga usa ka ilado nga Ricketta, kini—kini’y nagapakita lang kung unsay iyang. . . Kung magpakasal siya sa usa ka beauty queen o sa usa ka sex queen, o unsa man, nagapakita ra kini sa iyang, kung unsa gayud ang anaa sa sulod sa maong lalaki. Apan ang usa ka Cristohanon, ginatan-aw niya ang kinaiya sa usa ka babaye, tungod nga nagaplano man siya og umalabot nga panimalay kauban niana nga babaye. Nagaplano siya, og ginapili niya ang usa ka tig-atiman sa panimalay. Ug ingon ko, “Kung ingon-ana, si Cristo, sumala sa Iyang Pulong dinhi, nagaingon kanato kung unsa ang mamahimo natong umalabot nga Panimalay. Unsa kaha nga matang sa asawa ang pagapilion Niya kung ingon-ana, usa ba ka denominasyonhong bigaon? Dili gayud! Pilion Niya ang usa ka babaye nga gipaila pinaagi sa Iyang Pulong, ug ingon niana ang mamahimong Pangasaw-onon.”

49 Ug samtang atua ako didto, may Butang nga miigo kanako, ug wala na ko'y nahibaloan sulod sa mga traynta ka minutos. Adunay mitungha nga usa ka propesiya. Ang unang butang nga akong matiman-an, mao si Igsoong Mosley ug si Billy, ug ako atua na sa dalan, nga nagalakaw. Ug miingon Kini, "Ikaw Capernaum, nga nagatawag sa imong kaugalingon sa ngalan sa mga Manulonda," mao kana ang Los Angeles, ang siyudad sa mga manulonda, kita n'yo, ang mga manulonda, "nga gituboy ngadto sa langit, igaunlod ngadto sa impiyerno. Kay, kung ang gamhanang mga buhat gibuhahat pa unta sa Sodoma, nga gibuhahat diha kanimo, nagabarug pa unta kini hangtud niining adlaw." Ug nangasulti kadtong tanan nga wala ko, mahibaloi. Kita n'yo?

50 Ug daw sa unsa kong gipanghimangnoan sila, nga si Cristo, ginatuboy Siya ug ginasultian ang iglesia. Ingon ko, "Kamong mga kababayen-an, bisan unsaon ko pa sa pagpaningkamot nga anhian kamo, o magwali batok niining mga butanga; ug kamo pud nga mga kalalaken-an, kamong mga magwawali; padayon ra kamo nga nagapanglimbong sa tanang panahon, mao ra sa gihapon ang ginabuhahat. Ginalak-angan ra ninyo Kini nga daw sa wala ra'y pulos ang Pulong sa Dios."

51 Ug sa nasabtan ko na kadto, mipadayon ra ko, ingon ko, "Aduna gyu'y Kasulatan mahitungod niana sa kung asa man." Ug gipangita ko ug nahibaloan ko nga si Jesus kadto, nga nagabadlong sa Capernaum didto sa baybayon. Gitan-aw ko niadtong gabhiona ang mga Kasulatan. Sa pag-uli ko, gikuha ko ang libro sa kasaysayan; ug ang Sodoma ug Gomorra kaniadto usa—usa diay ka mauswagon nga siyudad, ang punoang-buhatan sa Gentil nga kalibutan kaniadto. Ug kabalo mo, nga kadtong siyudara, tungod sa usa ka linog, miunlod ngadto sa Dead Sea. Ug mibarug si Jesus, ug miingon, "Capernaum, kung gibuhahat pa sa Sodoma ang mga buhat nga gibuhahat diha kanimo, nagabarug pa unta kini karong adlaw. Apan karon ikaw na kinahanglan ang iunlod ngadto sa impiyerno!" Ug mga duha ka gatus o tulo ka gatus ka tuig pagkahuman sa Iyang propesiya, ang tanan niadtong mga lungsod sa baybayon, ang matag usa niadto milungtad sa gihapon gawas sa Capernaum, nga miunlod ngadto sa kinahiladman sa dagat. Usa ka linog ang nagpaunlod niadto sa dagat.

52 Ug ania ang propesiya, "Maunlod ang Los Angeles ngadto sa kinahiladman sa dagat." Ug mipauli ako, ug miadto na sa Africa. Ug samtang atua ako sa Africa, nagkaaduna sila og linog. Ug ang mga siyentista . . . Nakita n'yo kini, nasibya man kini, nga ang pipila ka dagkung, maanindot nga mga balay nangahugno, didto sa Los Angeles, ug ang usa ka motel, ug uban pa. Ug karon aduna na'y . . .

53 Sukad niadto nga linog, aduna na'y duha o tulo-ka-pulgada nga siak nga mikang-a sa yuta, nga nagasugod sa Alaska, palibot ngadto sa Aleutian Islands, mga usa ka gatus ug singkuenta o

duha ka gatus ka milya pagawas sa dagat, pabalik sa San Diego; nga naglangkob sa California, o sa Los Angeles, ug pagawas na pud sa ubos nga amihanang bahin didto sa California, usa ka gamay'ng lugar nga gitawag og San Jose, sa ubos niadto.

⁵⁴ Ug nag-istorya kadtong siyentista, nga anaa sa usa ka pagpakighinabi. Nagtan-aw man kami niadto sa telebisyon. Ug ang ingon niya, “Sa ilalum niana mao’y kinutaw’ng mga bato.” Ug gisulti niya kini, ingon niya, “Mokang-a pa kana nga siak,” ug ingon pa, “ug mokang-a gyud kana.” Ug kadtong nakighi- . . .

⁵⁵ Ang maong tawo, nga siyentista pud nga nakighinabi niining pangulo nga siyentista, miingon kaniya, miingon, “Bueno, kung ingon-niana mahimo kaha kana nga maunlod?”

Ingon niya, “Mamahimo? Mahitabo gyud kana!”

⁵⁶ Giingnan, “Bueno, siyempre, tingali’g sa daghan, sa daghan pa nga mga katuigan gikan karon.”

⁵⁷ Ingon niya, “Mahimong mahitabo kini sulod sa lima ka minuto gikan karon, o kaha mamahitabo kini sulod sa lima ka tuig gikan karon.” Migahin lang siya og lima ka tuig.

⁵⁸ Apan sa ingon ka sigurado nga nagatindog ako didto ilalum niadto nga Pagdihog, nga nagpahayag og paghukom sa West Coast, ug pagkahuman mosunod na kining pagkaunlod sa Los Angeles, wala na siya! Husto kana. Mahitabo gayud kini. Kung kanus-a? Wala ako masayod.

⁵⁹ Apan, oh, unsa ma’y nahitabo? Kabalo na mo, nga aduna na lang kita og unom ka kontinente karon. Aduna kita’y pito kaniadto, pero miunlod man ang usa tali sa Africa ug sa Estados Unidos. Oh, sumala kana sa kasaysayan, hingsayran n’yo na ang mahitungod niana. Karon, kung miunlod man kadto, nan buot ko nga bantayan n’yo sa kaniadtong. . .

⁶⁰ Usa kini ka wali nga giwali ko na kaniadtong, nagtoo ko, si Igsoong Elijah’ Perry tingali’g usa pa siya ka diyakono dinhi sa iglesia niadtong panahona, sa akong nahibaloan. Apan ang ingon niini, “Moabot ang panahon. . .” Wala ako mahibalo niini hangtud nga gidalhan ako ni Mrs. Simpson sa—sa maong wali niadtong miaging adlaw. Ug gisulat ko kini sa usa ka gamay’ng libro, nga, “Ang disyerto. . .” nga, “Ang kadagatan magadagayday paingon sa disyerto.” Kana’y traynta na ka tuig ang milabay.

⁶¹ Ug, siyempre, ang Salton Sea mga duha ka gatus ka piye man nga ubos sa lebel sa dagat, ug kung kanang dakung kinutaw, kanang ginalamoy na ang yuta nga sama niana, nga mosakup og gatusan ka milyas kwadrado, gatusan ug gatusan ka milyas kwadrado nga yuta ang nagakaunlod, siguradong magpahinungdan kana og dagku kaayong mga balod paingon sa Arizona. Sigurado, mahitabo gyud kana.

62 Oh, ania na kita sa katapusang panahon, sa mahimayaong takna, sa pagpakita na ni Ginoong Jesus! Miingon Siya, “Mahitabo ang mga linog sa nagkalinainlaing mga dapit, panagkalibog sa panahon, kagulan sa kanasuran, nga nangaluya na ang mga kasingkasing sa mga tawo tungod sa kalisang.” Ingon pa, “Sa diha nga kining mga butanga sugod nang nagakahitabo, ihangad ang inyong ulo, ang inyong katubsanang nagakahiduol na.” Oh, grabe!

Nations are breaking, Israel’s awaking,
The signs that the prophets foretold;
The Gentile days numbered, with harrows
encumbered;

Return, O dispersed, to your own. (Siguradoha
ninyo nga mabuhat n’yo kana!)

That day of redemption is near,
Man’s hearts are failing for fear;
Be filled with God’s Spirit, have your lamps
trimmed and clear,
Look up, your redemption is near! (Husto
kana.)

False prophets are lying, God’s Truth they’re
denying,
That Jesus Christ is our God.

63 Nakita n’yo ba ang maong retrato niadtong miaging adlaw, kung giunsa nga gipatakilid Niya kadtong retrato didto? Ug ang mismong retrato sa pito ka Mga Manulonda nga naipataas, giliso kini pa-tuo, ug atua ang nawong ni Ginoong Jesus nga nagalantaw paubos sa yuta pag-usab.

64 Mahinumduman ninyo niadtong giwala ko *Ang Pito Ka Mga Kapanahonan Sa Iglesia*, dili ako makasabot kon nganong nagatindog si Jesus didto nga adunay “puti” sa ibabaw sa Iyang ulo. Usa pa man Siya ka batan-ong Lalaki. Gibalikan ko kini sa Biblia, nag-ingon kini, “Miabot Siya sa Tigulang sa mga Adlaw, Nga ang buhok ingon ka maputi sama sa balhibo sa karnero.” Trayntay-tres anyos ug tunga lang man ang panuigon ni Jesus, niadtong pagkalansang Niya sa krus.

65 Gitawgan ko si Igsoong Jack Moore, nga usa ka teologo. Ingon niya, “Oh, Igsoong Branham, si Jesus kana sa Iyang mahimayaong kahimtang.” Miingon, “Human sa Iyang kamatayon, paglubong, ug pagkabanhaw, nahimo na Siyang ingon-niana.” Husto man kanang paminawon para sa usa ka teologo, apan wala kini mitukma, wala wala kini misibo sa punto.

66 Misaka na ako didto ug gisugdan ang unang kapanahonan sa iglesia, didto kini gipadayag na sa Balaang Espiritu. Karon maanaa na kamo niini diha sa inyong libro sa *Mga Kapanahonan sa Iglesia*. Siguro hapit na gayud maipagawas ang maong mga

libro, ang tibuok detalye niini. Ug gipakita diha niini nga si Jesus mao'y Maghuhukom. Adunay puti nga peluka nga ginasul-ob nila kaniadto, magsul-ob sila og peluka ug ginasul-ob kini ingon nga usa ka maghuhukom, og ginagamit sa gihapon kini sa England pag aduna ka og pinakataas nga awtoridad. Ug pag lisoong patakilid kini nga retrato, atua Siya, ang itum Niya nga buhok, makita n'yo kini sa kilid sa Iyang balbas, ug nagasul-ob og puti nga peluka. Siya mao ang may kinatapusan nga awtoridad, Siya mao ang may Pinakataas nga Awtoridad. Bisan ang Dios nag-ingon niini, Siya Mismo, "Kini mao ang Akong Anak nga pinalangga, patalinghugi ninyo Siya."

⁶⁷ Atua Siya uban sa mga Manulonda, ang Mensahe, nga mao ang pito ka pag-abli sa pito ka mga selyo nga nagpadayag sa *binhi sa serpente* ug sa tanan niining mga butanga dinhi. Ug nagapakita kini nga mao kadto ang Iyaha mismong pangtabon, kini'y—kini mao ang Iyang Pinakataas nga Awtoridad. Siya mao ang Labing-Hataas, ug naka-peluka Siya, o—o natabanon. Ngani miingon ang Biblia nga giusab Niya ang Iyang nawong, o giusab Niya ang Iyang Kaugalingon, *en morphe*. Ang maong pulong nagagikan sa Griyegong pulong, *en morphe*, nga nagakahulogan og usa ka Griyegong magdudula sa teatro nga nagkalahilahi ang iyang papel; karon siya'y usa ka butang, sa sunod nga hugna siya'y lahi na pud nga butang. Siya mao ang Dios, nga Amahan, diha sa usa ka hugna; ang Dios, nga Anak, sa usa na pud ka hugna; ug pagkahuman ang Dios, nga Espiritu Santo, sa ingon-niini nga hugna. Kita n'yo? Mao kana Siya, ang Iyang Pulong mao sa gihapon ang Labing-Hataas. Nagapuyo na kita sa kaulahiing mga adlaw.

⁶⁸ Sa pagbalik ko gikan sa Africa niadtong miaging adlaw, medyo gikapoy gyud ako. Nakita n'yo, gabii na didto karon, ug kinahanglan mo na usab mobalik sa oras dinhi. Ug ania ako nga nagabalik pa, nagabalik pag-usab. Aduna kami og maanindot nga pagbiyahe, sa pagpangayam, usa gyud sa pinakanindot nga nagkaaduna ako sa tibuok kong kinabuhi. Dayon adunay pipila ka mga retrato si Billy, siguro pag aduna na siya'y panahon mahimo niya kining ipakita sa kung asa man, ug ipakita kaninyo ang maong biyahe.

⁶⁹ Aduna ako'y damgo. Pirmi na kong gadamgo nga mibalik kono ko sa Public Service Company, sa usa ka hinungdan. Ug ako—naghunahuna ko nga daw sa nagpasagad ra ko sa trabaho, angay ko unta. . . Ginapasagdan ra man ko nila sa kung unsay akong buhaton, mao nga nakahunahuna ko nga mahimo kong. . . Imbis nga moadto ug susihon ang mga linya o kaha mangolekta sa mga balayronon, o ingon-niana nga angay ko unta nga pagabuhaton, miingon lang ko, "Bueno, ako man ang mismo kong agalon," og miadto ako aron maligo. Ug nakaabot ko didto ug gihukas ang akong. . . kining mga sinina, ug gisul-ob ang akong pang-ligo nga sinina. Nag-inusara

ra kono ko niadto. Ug nakahunahuna ko, “Bueno, dili gyud kini husto, ang kompanya. . . Adlawan pa baya, ginabayaran baya gyud ko sa kompanya para niining orasa.” Naghunahuna ko, “Pagkatalagsaon niini.” Ug unya nakahunahuna pud ko, “Bueno, ang kuwarta nga akong nakolekta sa rota. . .” Nasagol man nako ang sa pag-patrol ug sa rota, ug ingon ko, “Bueno, ang kuwarta nga akong nakolekta, og nakabuhat ko og usa ka butang, tungod sa paglingaw-lingaw dinhi; nawala ko hinoon ang tanan kong mga resibo, ug nasagol pa gyud nako ang ilang kuwarta ug ang akong kuwarta. Karon unsaon ko na man sa pagkahibalo kung kinsa ang nakabayad na sa balayronon?” Naghunahuna ko, “Tungod kay nagpasagad ra man gud ko!” Naghunahuna ko, “Dili kini husto. Adunay usa lang ka butang nga kinahanglan kong buhaton, kana’y, ang mobalik sa akong superintendente ug sultihan siya.” Si Don Willis kadto, ingon ko, “Don, nawala baya nako ang mga resibo. Karon ania ang tanang kuwarta nga aduna ako, ug ania ang ilang kuwarta, usab. Ibilin ko kini dinhi sa kahera. Ug ang mga tawo, pagmoanhi sila, aduna man sila’y resibo nga nadawat ko ang ilang bayad.”

⁷⁰ Tingali’g adunay mga tawo nga nagalingkod dinhi nga ako—akong. . . kabalo kong aduna gyud. Nga nakolektahan ko sila sa—sa kaniadto nga mga adlaw, ug akong. . . ug gihatagan ko man tanan og resibo. Kabalo mo, diyes porsyento lang kaniadto kung molapas kamo sa pagbayad sa inyong balayronon. Ug tingali’g, usa ra ka dolyar ug tunga, og mosobra ra sa kinse sentimos. Daghan niadto nga mga tawo ang nagpuyo. . . Gusto man gud namo kaniadto nga magkitaay ug mag-inistoryahanay, ug malimtan na lang nila ang ilang balayronon, pagmoadto ako ug makig-istorya kanila sa makadiyut. Magmulta ra man sila og kinse sentimos, kabalo na mo, molingkod lang ko didto ug makig-istorya sa makadiyut, ug kolektahon ang ilang balayronon. Busa natigum kadto, ug daghan na kaayong mga balayronon nga wala ko na makolekta kanila.

⁷¹ Bueno, nakahunahuna ko nga mao lang kadto ang paagi nga mahimo ko kadto. Ug nakamata na ko.

⁷² Sa lugar kon diin kami nagapuyo, si Igsoong babayeng Larson, wala siguro siya dinhi, siya’y buutan kaayo kanamo; ug ayaw niya nga magsulti ako ug ingon-ana. Apan siya’y usa ka buutan gayud nga babaye, ug nagpuyo kami sa iyang mga lawak. Aduna man siya’y duha ka apartment, gagmay’ng mga apartment, og among giabangan kadtong duha. Ug didto ako ug ang akong asawa nagatulog sa—sa pikas lawak kon diin ko ginaabi-abi ang mga tawo pagmahimo ko, ug aduna ma’y duha ka gagmay’ng kapares nga mga higdaanan didto.

⁷³ Nakamata na ko. Wala pa siya ningmata. Ug pagkataudtaud, ningmata na siya. Ug gikamay ko siya, ug mitan-aw siya ug gikipat-kipat ang iyang mga mata sa pila ka higayon. Miingon ko, “Nakatulog ka ba og ayo?”

Ingon siya, “Wala.”

⁷⁴ Ug ingon ko, “Aduna ko’y kahibulongan kaayo nga damgo. Mibalik kono ko sa Public Service Company pag-usab.” Ingon ko, “Unsa kaha’y akong nabuhat?”

⁷⁵ Mahinumduman ko, ingon nga usa pa ka batang lalaki, o usa ka batan-ong lalaki kaniadto, ginapatrolya ko ang tanang mga linya didto sa Salem, Indiana, sa nagkalainlaing. . . Mosulod ako, mopalit og—og pamahaw, siguro mga usa ra ka panaksan sa abena. Tungod niadtong mainit nga adlaw ug tanan na, ug magpadaut kadto sa akong paminaw, pagdili ko mokaon og pamahaw. Mobayad ra ko og diyes sentimos, sa akong diyutay ra nga kuwarta. Miabot ang superintendente ug miingon, ang ingon, “Kahibalo ba ka kung unsay giingon nila sa—sa miting? ‘Kinsa man kadtong burong nga tawo nga mibayad ra og diyes sentimos, para sa pamahaw?’” Miingon, “Kinahanglan dili moubos sa singkwenta sentimos ang imong ibayad.” Karon, kabalo na mong tanan, nga ang singkwenta sentimos kaniadtong mga adlaw daku na para sa usa ka pamahaw.

Ug ingon ko, “Bueno, dili man pud ko nagakaon og ingon-ana ka daghan.”

Ingon siya, “Lagi, pero ang tanang uban pa kanila nagahatag man og resibo nga singkwenta sentimos. Kinahanglan mohatag pud ka og resibo nga singkwenta sentimos.”

Ingon ko, “Bueno, wala man pud nako tanan nagamit.”

Miingon, “Paghatag gihapon, bisan pa.” Akó kadtong superintendente.

⁷⁶ Bueno, naghunahuna ko, “Bueno, unsa ma’y mahimo ko? Kinahanglan gyud diay kong mohatag og resibo nga singkwenta sentimos, bisan diyes sentimos ra ang kantidad sa akong nakaon.” Kung ingon-ana moadto na lang ko sa dalan ug mangita og gagmay’ng mga bata nga walay mga pamahaw, ug palitan sila og pamahaw nga nagkantidad og kuwarenta-sentimos.

Ug dayon nahunahuna ko, “Bueno, unsa kaha’y. . . Tingali’g mao kana ang Iyang gikasukoan kanako.”

⁷⁷ Ug mahinumduman nako, dinhi dili pa lang dugay, nga nagapatrolya sila, og naguba nila ang likod sa nataran ko didto, ug miingon, “Padad-i lang ’mi sa balayronon.” Kabalo mo aduna man sila’y mga katungod sa pagpatrolya, apan kinahanglan nilang mobayad para sa danyos.

⁷⁸ Gisulatan ko sila balik ug miingon, “Wala kamo’y unsa man nga pagabayaran.” Nahunahuna ko man gud, “Mao na kana’y akong pambayad sa mga tig-kuwarenta-sentimos ko kaniadto. Mahimong nakagasto ako og baynte o traynta ka dolyares niadtong panahona, sa mga gipamalit ko para sa mga bata.

Mahimong mao na kana ang pangbayad ko.” Padayon ra ko sa pagdamgo ko.

⁷⁹ Dayon aduna man ko’y usa ka dakung kahoy didto, nagadula gani ang mga bata sa ilalum niadto, ug ang mga nagapatrolya . . . Nagapatrolya na sila karon gamit ang usa ka helikopter. Ug miabot siya ug miingon, “Billy, unsa kaha kung putlon nato kana nga kahoy?”

⁸⁰ Ingon ko, “Ayaw, ayaw kana putla. Pul-ongan ra namo kana.” Ingon ko, “Ako ug si Igsoong Wood ra ang magpul-ong niana.”

Miingon, “Bueno, paanhion ko na lang ang among tawo ug papul-ongan kana.”

Ingon ko, “Karon, ayaw baya ipaputol ha.”

Ingon siya, “Dili ko kana ipaputol.”

⁸¹ Mibiyahe man ako niadto. Sa pagbalik ko, giputol na kini hangtud sa yuta. Bueno puede kong mopasaka og sumbong, nakita n’yo. Ingon ko, “Bueno, Ginoo, mahusay ra gyud kini, kahibalo ko.” Busa wala ko na gipadayon kadto, okey na lang kanako, og gipasagdan na lang kadto. Bueno, gidamgo ko sa gihapon kadto.

⁸² Sa pagbangon ko niadtong miaging buntag, ingon ko, “Bueno . . .” Ang unang butang nga ginabuhat namo inig kabuntag pagmombangon na kami, mao ang magdungan og ampo, dayon nagaampo pud kami pagmatulog na inig kagabii. Ug dayon pagkahuman nga mihawa na ang asawa ko aron mag-andam og pamahaw sa mga bata, misugod na pud ko sa pag-ampo. Ingon ko, “Ginoo, siguradong usa gyud ko ka dautan nga tawo. Unsa ma’y nabuhat ko sa akong kinabuhi, nga dili man gyud ko—ko makaikyas gikan nianang Public Service Company.”

⁸³ Misulod ko ug naligo na, ug unya migawas. Ug daw sa may sa kung unsang butang nga misulti kanako, “Tingali’g nagpasagad ra gyud ko sa *Iyang* buluhaton.” Nahunahunaan ko, “Mga lima na ka tuig nga wala pa ako’y unsa man nga nabuhat, og nagahulat lang Kaniya.”

⁸⁴ Nagatindog ko didto niadtong miaging adlaw. Gipatukoran man nila kami og bag-o nga balay didto, ug miabot si Igsoong Mosley, naghigot mahitungod niadto. Ingon ko, “Usa lang kana ka diyutay’ng gasa gikan sa akong Amahan.” Ug sugod na siyang mihilak. Ingon ko, “Nakita mo, miingon Siya, ‘Kung biyaan n’yo ang inyong mga panimalay, mga balay, mga kayutaan, mga amahan, og mga inahan, pagahatagan Ko kamo og mga balay, mga kayutaan, mga amahan, mga inahan, ug usa ka gatus-kapilo niining kinabuhia, ug Kinabuhing Walay Katapusan nga palaaboton.’” Ingon ko, “Kita mo, kinahanglan kong biyaan ang tabernakulo nga gihigugma ko pag-ayo. Ang akong panimalay nga gikahatag sa Ginoo kanako didto, kinahanglan kong biyaan

kini. Bag-o ra pud Niyang gibalik kini kanako.” Ingon ko, “Siya’y kahibulongan gayud, nakita mo.” [Blangko nga bahin sa teyp—Ed.] Ug sugod na siyang mihilak.

⁸⁵ Bueno, ako—miingon ko, “Kinahanglan kong moanhi dinhi ug ihimulag ang kaugalingon ko, og moanhi niini nga disyerto.” Ug nahunahunaan ko, “Nganong gidala kaha ko sa Dios sa usa ka disyerto, dinhi kon diin wala gyu’y bisan unsa gawas sa mga tanga ug Gila nga mga ibid?”

⁸⁶ Dili kini usa ka disyerto lamang, nga mainit, apan sa espirituhanon usa kini ka disyerto. Oh, grabe! Wala gyu’y espirituhanon nga kinabuhi man lang, sa mga kaiglesiahan, sila’y batok . . .Aba, wala pa kamo’y nakita nga ingon niana sa inyong kinabuhi! Wala gani kita’y usa ka iglesia nga maadtoan, o unsa man. Ug dayon kung ingon-ana . . .Mangamatay na halos ang mga tawo, sa espirituhanon. Namatikdan ko kini diha sa mga tawo nga gikan didto, makita ko ang pagkalahi nila, og nabantayan ko kana.

⁸⁷ Ug mao nga magpabilin gyud kamo ilalum sa Espiritu sa Dios, aron ang inyong kinabuhi mamahimong malumo, malulot, sama sa tubig nga nagahimo niining sagbot og mahumok nga mga salingsing. Kung . . .kining mga sagbot, didto sa Arizona, dili kini motubo; kining mga punoan mamahimo nang cactus, og ang mga dahon mamahimo nang tunokan. Ingon niana usab pagnagakauga na kamo diha sa iglesia, ang tanan mangtunok na sa usa’g usa, kabalo na mo. Ug, kita n’yo, mao nga kinahanglan ninyong magkaaduna og malumo nga mga tubig sa ulan nga magapalumo kaninyo, ug magapahimo og mga dahon ug landong alang sa mga magpapanaw nga nagapangagi.

⁸⁸ Ug may Butang nga miingon kanako, “Tingali’g nagapasagad ka ra sa buluhaton sa Dios.” Busa, nag-ampo ako alang sa usa ka panan-awon.

⁸⁹ Ug bag-o lang ko niadto gihatagan ni Meda og usa ka Biblia; ug si Igsoong—Igsoong Brown, nga taga-Ohio, gihatagan pud ko niya og Biblia; silang duha sa mao rang higayon, niadtong Pasko. Miadto ko ug gikuha ang usa sa bag-ong mga Biblia. Ingon ko, “Ginoo, sa nangaging mga panahon, aduna Ka ma’y Urim ug Thummim kaniadto.”

⁹⁰ Karon paminaw, tugoti kong isulti kini. Siyempre, wala man nila . . .kini, wala kini gina-teyp nga panagtigum, mao’y hinungdan nga naghangyo ko . . .sa pagsulti niini. Tugoti ko sa pagsulti, ayaw n’yo buhata kini. Dili kini usa ka maayong butang.

⁹¹ Apan miingon ko, “Ginoo, sa una, pagmagdamgo ang usa ka magdadamgo, dad-on nila kini ngadto sa Urim ug Thummim, ug isulti kini. Ug kung ang—kung ang Urim ug Thummim mohatag og kahayag, usa ka supernatural nga Kahayag, tinuod ang maong damgo.” Ingon ko, “Apan ang pagka-sacerdote ug

ang Urim ug Thummim giwala na man. Ang Imong Biblia mao na ang Urim ug Thummim karon; Ginoo, hinaut nga dili ko na buhaton kini pag-usab. Apan naghangyo ako Kanimo ug nag-ampo Kanimo, nga hatagan Mo ako og usa ka panan-awon, magpakigsulti Ka kanako kon nganong nagadamgo man ko sa ingon-niini nga mga damgo. Ug unsa ma'y nabuhat ko? Kung nakapasakit man ko, kung nakabuhat man ko og unsa man ngadto sa bisan kinsa nga tawo sa kalibutan, pahibalao ako. Ako—ako—moadto ako og tul-iron kini. Kung may utang man ako sa Public Service Company, kung nakabuhat man ko og usa ka butang nga sayup ngadto kanila o sa bisan kinsa man nga tawo, kung nakabuhat man ko og usa ka butang nga sayup nganha Kanimo, pahibalao ako. Gusto ko—kong tul-iron kini.”

⁹² Tul-iron na nato kini, karon. Ayaw na paghulat nga magdugay pa, tingali'g mahimong ulahi na kini. Buhaton na nato kini karon.

⁹³ Ug ingon ko, “Siguradong, aduna gyu'y usa ka butang niining Pulong sa Dios, gikan sa Genesis hangtud sa Pinadayag, nga aduna gyu'y tawo dinha nga Imong gipakigharongan, nga anaa sa mao mismong kahimtang sama sa akong pangutana. Kung aduna ma'y nakabuhat sa maong butang, ug—ug Imo siyang gisaway mahitungod niana, nan tugoti kong maablihan kana nga bahin diha sa Biblia. Ug kung aduna man, bisan unsa pa ma'y ilang nabuhat, mahiuyon unta kini sa akong kahimtang. Kung diin man ko nakabuhat og sayup, o may usa ka butang nga gusto Mo unta nga buhaton ko, o wala nabuhat, tugoti kong makakita og pipila ka tawo nga ingon niana sa Biblia.”

⁹⁴ Ug gipiyong ko ang akong mga mata, gipasagdan lang nga maabli ang Biblia, og gibutang ko ang akong tudlo sa Kasulatan, Genesis 24:7. Si Eliezer, ang kasaligang alagad ni Abraham, ang ehemplo nga alagad sa Biblia, nga gipadala aron sa pagpangita og pangasaw-onon para kang Isaac. May sa kung unsa nga bugnaw ang misunop sa tibuok kong lawas. Oo, kadto ang akong. . . mitukma kaayo kadto sa uban pa nga bahin sa akong Mensahe, ang pagkuha og Pangasaw-onon.

⁹⁵ Miingon si Abraham, “Panumpa nga dili ka mokuha og usa ka pangasaw-onon gikan sa mga ingon-niini, kondili umadto ka sa mismo kong kaparyentihan.”

Ingon niya, “Unsa kaha kung ang maong babaye dili mouban kanako?”

⁹⁶ Miingon, “Kung ingon-ana makagawas ka niini nga panumpa.” Ingon siya, “Ug ang Dios sa Langit magasugo sa Iyang Manulonda sa unahan mo, aron sa paggiya kanimo.” Milakaw na dayon siya ug misugod sa pag-ampo, ug nahinagbo gyud niya ang matahum nga si Rebecca nga nahimong pangasaw-onon ni Isaac.

⁹⁷ Usa ka hingpit gayud nga Mensahe, nga nagasubay sa Pulong, “Lakaw ug kuhaa kana nga Pangasaw-onon!” Usa kana ka katungdanan. Mao kana’y akong gianhi. Mao kana’y ginapaningkamotan kong buhaton, ang pagtawag pagawas sa usa ka Pangasaw-onon.

⁹⁸ Mahinumduman nako didto sa California, kadtong pakighinabi mahatungod sa Pangasaw-onon, ang pasiunang-pagpakita, nga naisulti ko na dinhi. Daw sa unsa nga unang miabot kadtong Pangasaw-onon, ug nakita ko Siya nga miagi. Dayon miabot pud ang Miss Amerika, Miss Asia, ug tanan na, oh, makahahadlok tan-awon! Ug dayon ang mao gihapong Pangasaw-onon miagi pag-usab. Usa kanila ang mitipas sa Iyang lakang, ug gipahibalik ko Siya sa Iyang lakang; duha kanila, diay. Ug mao kana ang angay kong pagabuhaton, siguradohon kanang maong Pangasaw-onon nga nagasubay sa paglakaw, og pangitaon kana nga tawo.

⁹⁹ Ingon ko, “Dios, mopauli ako, igapanaad ko pag-usab ang maong mga panaad, ug magsugod og bag-o.” Ug mao kana ang ginaplano natong buhaton, mao kana’y akong gianhi.

¹⁰⁰ Sa hunahuna ko usa ka maayong butang kung buhaton nato ang ingon-niini, magsugod na lang kita sa ikadise-otso, sa sunod semana, sa sunod Dominggo sa buntag, og sa sunod Dominggo sa gabii; pagkasunod Dominggo, ug pagkasunod Dominggo na pud. Pila man ang nakahunahuna nga maayo kana? [Nagaingon ang kongregasyon, “Amen.”—Ed.] Salamat.

¹⁰¹ Karon gusto ko nga aduna mo’y buhaton para kanako. Kung may mga tawo na kamong napahibalo na nga adunay—adunay panagtigum sa ikabaynte-otso, mahimo n’yo ba nga pahibaloon sila pag-usab, nga dili nato mapahigayon kini. Sultihi, padadi ninyo sila og sulat, o ingon niana. Dili nato gusto nga basin makaanhi pa ang mga tawo ug mapalaw hinoon, tungod nga dili man nato magamit ang maong awditoryum.

¹⁰² Kita n’yo, dili nato magamit kini. Ug tungod nga sa miaging panagtigum sa hunahuna ko daghan ra ’ta kaayo didto, ug tanan na, sila gayu’y . . . Kabalo na mo kung unsa ang publiko, ug sila . . . Bueno, nagapuyo na gyud kita sa kaulahiing mga adlaw, kana lang. Ug ginaingon nila nga niadtong nangabot ang mga tawo ug nakadisturbo kono kadto sa maong tulonghaan, ug nangabot kono nga sayo ra kaayo, ug gibuhat kono nila *kini*, o *kana*, o ingon niana, ug nagkapunsisok kaayo ang maong lugar, ug gibuhat na sa mga bombero ang *ingon-niini* ug *ingon-niana*. Ug, bueno, kabalo na mo.

¹⁰³ Mao nga pagahisgotan nato ang mga Panaksan ug ang mga Trumpeta, gusto ko nga ilakip ang mga niini. Gisultihan ko na kamo nga buhaton ko kini. Naklasipikar ang mga niini sa usa pa ka butang. Mao man usab ang mga Panaksan, ang pagtingog sa mga trumpeta; apan gusto natong tun-an ang

tibuok hilisgotanan nga dire-diretso, ug hisgotan kini, og itakdo ang mga niini.

¹⁰⁴ Pila man ang nakabasa na sa gisulat ni Igsoong Vayle, mahitungod niadtong gisulat niya og utro, ug nga gihan-ay pa kini ug gihusto ang gramatika niini para kanako? Nabasa n'yo na ba ang bisan unsa man niini? Nakabasa na, ang duha o tulo kaninyo. Sa tan-aw ko maayo gayud ang pagbuhat mo, Igsoong Vayle, maayo kaayong pagtrabaho! Imong, sa hunahuna ko si Igsoong babayeng Vayle ang nagbuhat niini; ug gisulat mo lang kini. Siya—siya'y usa ka. . . Kita n'yo, dili man ko kanunay'ng batok sa mga kababayen-an, 'di ba, Igsoong babayeng Vayle?

¹⁰⁵ Ug karon, sulod sa sunod nga kinse minutos, baynte minutos, magabasa kita og usa ka Kasulatan dinhi.

¹⁰⁶ Ug aduna ko og usa ka gamay'ng libro dinhi. Nagsulti ko, nga sa hunahuna ko, si Igsoong Vayle, o, kung kinsa man, o sa hunahuna ko nga si Roy Borders kadto. Gipalitan man ko ni Igsoong Vayle og sulatanan. Gusto ko man gud maghimo og usa ka gamay'ng sulatanan sa mga teksto.

¹⁰⁷ Apan kung aduna ma'y nakakita na sa ginatawag kong mga sinulat! Sama lang nga gusto kong mowali mahitungod sa Bitoon sa Kabuntagon, mag-drawing ako og usa ka bitoon. Ug kung gusto pud nakong mowali og usa ka butang mahitungod sa. . . ginahimo ko ang tanan nga mga simbolo dinhi, mga kuris-kuris, og wala gyu'y bisan kinsa ang makahibalo kung unsa kini. Samtang anaa ko sa gawas, ug makahunahuna ko og unsa mang butang, nga kinahanglan kong pagabuhaton, samtang nagabiyahe, usahay pag nagaugpot-ugpot ang sakyanan, ug isulat ko *kini*, ug isulti ang *ingon-niini* ug *ingon-niana*, ug mohimo og gagmay'ng mga ilhanan, ug mga ikis ug mga taytayan, ug—ug tanan nang matang sa mga butang. Sama lang pud pag gusto kong mowali mahitungod sa pagkahulog sa Bitoon; ug magbutang ko og piramide, i-drawing kini dinhi ug ibutang ang bitoon ni David nga may lima-ka-tumoy nga nagapaubos niini. Ug kahibalo na ko kung asa na ko paingon sa mga Kasulatan pag ingon-ana; ug si Moises, kung bahin sa usa ka butang nga gibuhat niya. Mag-drawing lang ko og gagmay'ng mga marka sa tunob sa pabo, mga ingon-ana.

¹⁰⁸ Ngani aduna ko og pipila sa mga niini dinhi. Ug naghunahuna ko, karong buntaga, dinha sa likod sa dihang nahunahunaan kong maghisgot sa niining hilisgotanan sa pipila ka minuto dinhi, sa usa ka sinulat ko, tingali'g magkinahanglan ra ko og baynte minutos.

¹⁰⁹ Ug unya dili ko pagakuhaon ang panerbisyo ni Igsoong Neville unyang gabii. Ako—ako—magpahulay ra ko unyang gabii, og maminaw kaniya.

¹¹⁰ Ug dayon, kon itugot sa Ginoo, pagkasunod Domingo sa buntag sugdan na nato ang maong buluhaton. Ug tabangi ko

ninyong tanan, ug iampo gyud nato, tungod kay anaa gyud sa akong kasingkasing nga paningkamotan. . . Ingon nila, “Bueno, mahimo man kitang moadto sa Louisville o kaha mahimo kitang moadto sa New Albany.” Apan ang panagtigum para man gud sa Jeffersonville. Puede man ko sa Louisville ug sa New Albany, sa unsa mang higayon, apan para ra gyud kini dinhi sa Jeffersonville.

¹¹¹ Karon iduko nato ang atong mga ulo sa makadiyut samtang kita. . . Halos traynta minutos na akong nagpakig-estorya kaninyo dinhi. Magpakigsulti sá kita Kaniya sa makadiyut.

¹¹² Ginoong Jesus, gipanalanginan gayud kami—kami nga mga tawo, nga lagpas sa among mga gihunahuna, lagpas sa among mga panabut. Kay, kung aduna ma’y usa ka halangdon sa among taliwala, sama sa usa ka kawani nga gikan pa sa ubang nasud, o usa ka diplomata sa kung unsa man, mahunahuna namong pagkahalangdon nga magkaaduna og usa ka halangdong tawo sa among taliwala. Apan karon anaa man kanamo ang Dios sa Langit, dili lamang sa among taliwala, kondili anaa sa sulod namo, nga nagapuyo, nga gikinabuhi ang Iyang Kinabuhi pinaagi kanamo. Ug mapasalamaton gyud kami tungod niini, Ginoo! Lagpas kini sa among mga panabut, sa tinuod lang.

¹¹³ Apan karon nagahisgot kami mahitungod sa mga buluhaton, ug sa pag-adto sa Africa, ug sa mga butang nga gipaningkamotan namong maiandam para niining pipila ka mga adlaw dinhi sa Indiana. Ug sa kung unsa mang hinungdan, Ginoo, tingali’g ginadala Mo kami nianang tolda, aron mamatuman kana nga panan-awon. Busa ang Imong kabubut-on matuman, ginatugyan namo kini sa ingon-niini nga paagi, sa pinakamaayo namong panabut. Busa nagaampo kami, Ginoo, kung aduna ma’y bisan unsa nga supak sa Imong kabubut-on, ipahibalo Mo kini kanamo, aron mahibalo kami sa pagbuhat sa Imong hingpit nga kabubut-on.

¹¹⁴ Karon panalangini kami sa niining mosunod nga pipila ka minuto. Magpakigsulti Ka kanamo pinaagi sa Imong Pulong, Ginoo, kay ang Imong Pulong Kamatuoran. Amo kining ginapangamuyo sa Ngalan ni Jesus. Amen.

Atong ablihan ang Biblia, ngadto sa Marcos, sa ika-8 nga kapitulo.

¹¹⁵ Unsang orasa mo kasagaran nagatapos, mga alas dose? [Adunay nagaingon, “Mga alas dose.”—Ed.] Sige. Karon, karon usa lang ka hamubong Mensahe dinhi ang mahimo kong mahisgotan kaninyo mahitungod sa Pulong, human sa pagpamatuod ko mahitungod didto, ug uban pa.

¹¹⁶ Marcos, sa ika-8 nga kapitulo, ug atong pagasugdan diha sa ika-34 nga bersekulo, hangtud sa ika-38, lakip na ang ika-38, og tanang uban pa niana nga kapitulo. Gusto kong basahon kung

unsay Iyang gisulti, tungod kay nasayod ko nga tinuod kana. Karon atong. . .

Ug gitawag niya ang panon sa katawhan uban sa iyang mga tinun-an, siya miingon kanila, Kung kinsa ang buot mosunod kanako, magdumili siya sa iyang kaugalingon, ug magpas-an sa iyang krus, ug mosunod kanako.

Kay bisan kinsa nga buot magluwas sa iyang kinabuhi mawala kini kaniya; . . . bisan kinsa nga mawad-an sa iyang kinabuhi tungod kanako ug sa maayong balita, kini maluwas niya.

Kay unsa man ang kapuslanan sa usa ka tawo, kung maangkon niya ang tibuok kalibutan, ug mawala ang iyang kalag?

Kay unsa ang igahatag sa usa ka tawo nga baylo sa iyang kalag?

Kay bisan kinsa nga magakaulaw kanako ug sa akong mga pulong dinhi niini nga kaliwatan nga mananapaw ug makasasala; ang Anak sa tawo magakaulaw usab kaniya, kung moanhi na siya nga sa himaya sa iyang Amahan kauban sa mga balaan nga mga manolonda.

117 Gusto kong mokuha og usa ka gamay'ng teksto gikan dinha, kung kini man matawag nga, matawag nga: *Pagkaulaw*. Kabalo mo, gusto ko kana. “Bisan kinsa nga magakaulaw Kanako ug sa Akong mga Pulong, igakaulaw Ko pud siya.”

118 Karon, ang pulong nga *pagkaulaw* mahimong hubaron usab nga “naulaw.” Kabalo na mo, mora ka bang. . . Nag-atubang ka sa usa ka butang nga ginakaulaw mo, ingon nga naulaw ka.

119 Ug, ang usa pa ka butang sa pagkaulaw, nagapakita ra kini nga dili ka sigurado sa kung unsay imong ginasulti. Kung kabalo ka sa imong ginasulti, ug sigurado gyud ka nga nahibalo ka sa imong ginasulti, mahimo mong sultihan si kinsa man niana; wala ka naulaw. Apan kung mabati mo nga dili ka mahimutang, dili mahimutang, nagapakita kini nga dili ka sigurado.

120 Mahimatikdan ninyo nga daghan kaayong ingon-niana sa karon, ilabina sa hilisgotanan nga akong ginahisgotan, “*nagakaulaw sa Pulong*.” Karon, Siya ug ang Pulong usa ra.

Sa sinugdan mao ang Pulong, ug ang Pulong kauban sa Dios, ug ang Pulong mao ang Dios.

Ug ang Pulong nahimong unod, ug nagpuyo ipon kanato, . . . Mao ra sa gihapon kagahapon, karon, ug hangtud sa kahangturan!

121 Busa, “Ang si kinsa man nga magakaulaw Kanako ug sa Akong Pulong,” ug Siya ug ang Iyang Pulong Usa ra man, busa ang magakaulaw sa Iyang Pulong sa niining makasasala, kasamtangan nga henerasyon, “Igakaulaw Ko siya.”

¹²² Karon mahimatikdan nato karong panahona, kung adunay moingon, “Usa—usa ka ba ka Cristohanon?” Usa kini ka popular kaayo nga butang, moingon, “Oh, usa ako ka Cristohanon!” Kita n’yo?

¹²³ “Apan nagatoo ka ba sa Pulong sa Dios, kon diin miingon Kini, ‘Kini nga mga ilhanan maganunot kanila nga nagatoo?’”

¹²⁴ “Oh!” Mamula gayud bisan pa ang mga nawong sa mga ministro. Kita n’yo?

¹²⁵ Ginakaulaw mo ba, ingnon na lang nato, kining Balaanong pagpang-ayo? Ginakaulaw mo ba ang bug-os nga Ebanghelyo? Ginakaulaw mo ba ang imong kasinatiang pentecostal? Ginakaulaw mo niana ang Iyang Pulong. Kana ang Iyang Pulong nga nahimong unod diha kanimo.

¹²⁶ Busa, kinahanglan nga buhion sa Iyang Pulong ang Kaugalingon Mismo Niini sa matag henerasyon. Gibuhi ang Kaugalingon Mismo Niini niadtong mga adlaw ni Moises. Tungod nga, niadtong panahona, miingon ang Biblia, sa Mga Hebreohanon, ika-1 nga kapitulo, “Ang Dios, sa nagkalainlaing mga panahon ug nagkalainlaing mga paagi nagpakig-istorya sa atong mga ginikanan pinaagi sa mga propeta.”

¹²⁷ Ug kadto nga mga propeta! Nangatuis gayud ang iglesia kaniadto nga sa dihang. . . Kadto nga mga propeta, kadtong maisog nga mga mensahero sa Dios, nangabot nga walay iglesia, walay denominasyon, walay organisasyon, walay bisan usa; gisuklan ang mga hari, mga gingharian, mga iglesia, ug tanan-tanan na. Sa diha nga gipangdala ang mga sacerdote sa atubangan. . . Gipangdala sila sa atubangan sa mga sacerdote, wala gyud sila naulaw, tungod kay anaa man kanila ang direkta nga MAO KINI ANG GINAINGON SA GINOO.

¹²⁸ Kung nahimatikdan ninyo, ang propeta, usa sa mga kahulugon niining pulong, diha sa Daang Tugon, pagmoingon siya nga MAO KINI ANG GINAINGON SA GINOO, karon himatikdi n’yo siya, nagasulod siya sa mao mismong pamulong nga ginapuwesto ang kaugalingon niya sa dapit sa Dios. Mahimatikdan ninyo, sa dihang misulti siya sa atubangan niya, MAO KINI ANG GINAINGON SA GINOO, direkta siyang nakasulod sa Dios, ug nanglihok siya nga sama sa Dios. Dayon gihatag niya ang iyang Mensahe, nga mao ang Dios nga nagapakigsulti pinaagi kaniya, “MAO KINI ANG GINAINGON SA GINOO!”

¹²⁹ Mahunahunaan ko ang mga propeta kaniadto, sa diha nga mitungha sila nga may dalang ingon-niana nga Mensahe, ug gipakaulawan Niini ang mga hari, ug gipabati Niini ang mga tawo og kaalingasa. Ang mga sacerdote, bisan pa, dili sila mahimutang kaniadto, tungod nga sila’y mga lider man unta, relihoyoso nga mga tawo, ug sa diha nga sila. . . mitungha man

ang Pulong sa ingon niadto nga paagi, gibutyag sila Niini, ug mibati sila og kaulaw, o nangaulawan.

¹³⁰ Ug sa makadaghan nang mga higayon nga atong makita kana, dili lang sa makadaghan, kondili kanunay gayud sa karon! Nga ang tawo, pag moingon kini, “Usa ako ka Cristohanon!”

“Nadawat mo ba ang Espiritu Santo sukad nga mitoo ka?”

“Oh! Huh!” Nakita n’yo, sila—sila’y naulaw bahin Niini.

¹³¹ Adunay moingon, “Miyembro ka ba nianang pundok dinha nga nagahimo sa tanan nianang mga pagsinggit, ug sa tanan nianang Balaanong pagpang-ayo nga butang?” Sa makadaghang mga higayon, moatras ang mga Cristohanon.

¹³² Ang gusto nilang ipahibalo, kung—kung aduna man sila og denominasyon, kanang, “Baptist ako. Presbyterian ako. Lutheran ako.” Dili nila ginakaulaw kana.

¹³³ Apan paghisgotan na ang bahin sa pagka-Cristohanon ingon nga mahimong dawaton ang Pulong sa Dios sa kung unsa gayud Kini, dayon sila—sila—mangaulaw na sila. “Dili ako miyembro sa unsa man nga denominasyon,” kita n’yo, sila, sila—maulaw sila sa pagpahayag niana. Gusto nila nga mahisama sa tanan nang uban pa sa kalibutan, nga girepresentar ang kung unsa man nga organisasyon.

¹³⁴ Karon, bag-o lang kana nahidangat sa ingon niana. Sa mga adlaw ni Luther, pag-ipaila mo ang imong kaugalingon ingon nga usa ka Lutheran o usa ka sumusunod ni Luther, bueno, magakahulogan kadto halos og kamatayon pinaagi sa iglesiang Katoliko. Sa panahon usab ni Wesley, pag mahibaloan nga misupak ka sa iglesiang Anglikano, halos kamatayon pud ang silot niini pinaagi sa mga Anglikano, pag ipahibalo mo nga usa ikaw ka Methodist. Sa mga adlaw pud sa Pentecostal, makauulaw kadto, halos, pag magpahayag ka nga ikaw—nga usa ikaw ka pentecostal, tungod kay pagaisipon ka man dayon nga usa ka holy-roller, o—o usa ka manunulti’g-laing-mga-dila, o mora’g ingon niana. Karon nag-organisa na sila ug miuban na mismo sa tanang uban pa nga pundok.

¹³⁵ Karon pagmoabot na ang takna sa pagtawag-pagawas, nga dili ka nahisakop sa bisan unsa man niini! Popular na kaayo kini nga isulti, “Pentecostal ako.” Popular na kaayo nga isulti, “Presbyterian man ko. Lutheran.” Apan unsa kaha pagmoabot na sa panahon nga gikinahanglan mo nang mogawas ug mobarug alang sa Pulong, “Dili ako nahisakop sa bisan unsa man niini?” Kana, mamahimong maulaw ka.

¹³⁶ Miingon si Jesus, “Karon, kung magakaulaw ka Kanako, nan igakaulaw Ko ikaw.” Nganong ikaulaw ka man Niya? Tungod kay nagapamahayag ka man ingon nga Iyaha, sa dihang dili ka man diay nagasunod Kaniya.

¹³⁷ Unsa kaha kung moingon ko, “Kini nga batang lalaki, siya’y—siya’y akong anak”; molingi siya ug moingon, “Kinsa, ako anak mo? Unsay tan-aw mo kanako!” Maulawan gyud ako niana. Mapaulawan ka, sa imong anak.

¹³⁸ Ug ingon niana usab sa ginatawag nila nga Cristianismo. Kung hinganlan mo kini og ngalan sa usa ka denominasyon, bueno, dawaton man nila ang pagka-amahan sa usa ka denominasyon. Apan paghisgotan na gani ang bahin sa pagdawat sa pagka-amahan sa Pulong sa Dios, ni Cristo, ayaw nila, mangaulaw sila. Ayaw nilang ipahayag, “Oo, misulti ako og laing mga dila. Oo, nakakita ko og mga panan-awon. Oo, nagatoo ako sa Balaanong pagpang-ayo. Oo, ginadayeg ko ang Ginoo. Gawasnon ako gikan sa tanan nga organisasyon, wala ako nagayukbo sa unsa man niana. Usa ako ka alagad ni Cristo.” Oh, grabe, mora gyud sila og ginabitas-bitas pag-ingon niana.

¹³⁹ Niadtong miaging gabii, may usa ka bantugang mamumulong nga miabot gikan sa grupo sa mga Full Gospel Business Men sa Chicago.

¹⁴⁰ Mahimo ba nga mohunong ko dinhi sa kadali lang, aron isulti kini. Pasayloa ko ninyo. Apan sa makadaghang higayon nagahunahuna kamo, ug ako usab, nga ang ginahisgotan nato, nga Kamatuoran sa Biblia, wala madawat sa mga tawo. Apan, nadawat nila Kini. Usahay mora’g ginabale-wala nila Kini, apan dili gayud nila ginatuyo kana. Buut lang nila mahibaloan kon asa gyud ka nagabarug.

¹⁴¹ Sama sa sugilanon mahitungod sa grupo sa mga palahubog, nga naglalisay nga wala na kono og ingon-anang butang sama sa Cristianismo. Miingon ang usa ka lalaki, “Kahibalo ko kon diin adunay usa niana, ang akong asawa.”

Dunay miingon, “Bueno, ako—dili ko motoo niana.”

Miingon, “Dali, atong . . . manglihok ’tang tanan ingon nga mga hubog na kaayo.”

¹⁴² Miadto sila didto sa maong balay, ug gibuhat ang tanan nga mahimo nila. Ug—ug miingon sila nga magpaluto kono sila og pipila ka itlog, ug pagkahuman gilabay ra sa maong lalaki ang mga itlog ngadto sa salog, ug miingon, “Nasayod ka na man unta nga dili ingon-ana ang pagluto sa mga itlog!” Kung unsa na lang ang ginapanghimo nila sulod sa maong balay. Ug misulod sila sa pikas lawak, og mihigda sa usa ka lingkoranan. May nadungog sila sa gawas nga nagahinlo niadto, nga wala man lang og usa ka pulong, nga ginasulti, nagaawit lang og usa ka hamubong kanta sa iyang kaugalingon.

Kinahanglan ba nga inusarang pas-anon ni
Jesus ang krus,
Ug ang tibuok kalibutan mahatagan og
kagawasan?

Adunay krus para sa matag usa,
Ug adunay usa ka krus para kanako.

Ug kining balaang krus akong pagapas-anon,
Hangtud nga makalingkawas ako sa
kamatayon;

Ug dayon makapauli na nga sul-obon ang
purongpurong.

¹⁴³ Miingon kadtong usa ka palahubog, “Unsa ma’y giingon ko kaninyo?” Ingon pa, “Usa gyud siya ka Cristohanon!” Kita n’yo, gisulayan lang nila siya. Ug usahay ang kalibutan, nahibaloan kong, mosulay pud kaninyo.

¹⁴⁴ Ug wala ko nagdahum nga mahitabo ang ingon-niini, apan sa miaging Sabado sa gabii, nagtoo ko nga Sabado kadto, o Domingo sa gabii, ang bantugang mamumulong... dili gyud ko nagasulti og mga ngalan sa mga tawo. Apan ang ginapaninguhaan niyang, buhaton ang tukma ka sukwahi. Ginapaningkamotan kong ipahilayo ang mga iglesia gikan nianang ekumenikanhong kalihokan, ug gipaninguhaan hinoon niining tawhana nga ipasulod sila dinha. Mao nga, namulong siya para sa Christian Business Men. Diin, ako unta ang mipahigayon niadtong tigum sa Chicago, ug nagdahum man ko nga basin atua pa ako sa Africa nianang panahona, mao nga wala ko nakapahigayon niini. Miingon kining maong tawo, misaka didto ug miingon, “Ang pinakadakung kalihokan, ang pinakadakung butang sa kalibutan karon, sukad pa kaniadto; nagapamalik na ang tanang mga iglesia ngadto sa iglesiang Katoliko, diha sa ekumenikanhong kalihokan, ug madawat sa mga Katoliko ang Espiritu Santo.” Pagkagrabe nga lit-ag sa yawa!

¹⁴⁵ Ug kining lider, nga si Igsoong Shakarian, nga presidente sa International Business Men, mitindog ug miingon, human nga milingkod na ang maong tawo, miingon, “Dili ingon-niana ang napatalinghugan namo.” Miingon, “Ang gisulti kanamo ni Igsoong Branham, nga, ‘Igahatud silang tanan niining ekumenikanhong kalihokan ngadto sa marka sa mapintas nga mananap.’” Ug didto ang maong lalaki nga nagalingkod pud ibabaw sa entablado. Miingon, “Magahatud kana ngadto sa marka sa mapintas nga mananap.” Ug ingon pa, “Mas toohan namo ang ginaingon niya nga mao ang Kamatuoran.” [Adunay nagaingon sa kongregasyon, “Amen! Kami usab!”—Ed.] Ug ingon siya, “Pila man kaninyo ang gusto nga moanhi og madungog si Igsoong Branham nga ipahayag kaninyo ang tinuod bahin niini? Tindog.” Ug adunay mitindog mga lima ka libo ka mga tawo. Nanagsinggit ug nanaghilak sila, aron lang moadto ako og usa ka adlaw, usa ra ka adlaw.

¹⁴⁶ Gitawgan ako ni Igsoong Carl Williams, miingon, “Igsoong Branham, grabe, miadto ako sa tunga niadtong mga tawo,”

miingon, “daghan kaayo sila og ginatus-nga-dolyar nga mga kuwarta nga gitunol sa akong mga kamot, aron lang mapalitan ka og tiket sa eroplano paanhi dinhi, ug pauli.” Kita n’yo, para sa usa lang ka adlaw!

¹⁴⁷ Kita n’yo, kadto nga mga tawo, mituhop diay ang Pulong nga usahay wala nato mahibaloan kini. Kita n’yo? Apan, kita n’yo, sa dihang ikaw gayu’y. . .Bisan unsa pa ka supak ang kalibutan Niini, unsa pa ka supak ang mga denominasyon Niini, ginapamatud-an gyud Kini sa Dios ingon nga mao ang Kamatuoran. Pagmoabot na ang dakung takna sa katapusan, magakahitabo ang mga butang tingali nga wala nato ginadahum.

¹⁴⁸ Oo, nagapakita ra kini nga dili ka sigurado, kung nagakaulaw ka, busa mas gustohon mo pa nga dili mo na lang hisgotan ang maong hilisgotan. Kung ginakaulaw mo kini, nan ayaw mo kining hisgotan; pugngan mo.

¹⁴⁹ Apan unsaon man sa usa ka tawo nga puno sa Espiritu Santo, unsaon man sa usa ka tawo nga puno sa Gahum sa Dios, ug nga ang gugma sa Dios anaa sa iyang kasingkasing, nga makig-istorya sa usa ka tawo sa kadali ug dili man lang makapaghigot og usa ka butang mahitungod sa gugma nga anaa sa iyang kasingkasing? Kita n’yo, aduna gyu’y butang nga—nga mahitabo; dili mo mapugngan kana.

¹⁵⁰ Kini mao, gayud ang dautan nga panahon nga gihisgotan ni Jesus. Ginakaulaw sa mga tawo ang Pulong ug ang Espiritu sa Dios nga nagapamuhat sa sulod nila. Apan sa diha nga napatin-aw ang Kamatuoran nganha sa mga tawo, dayon ang Dios na, Mismo, ang nagapadayag sa Iyang Kaugalingon pinaagi sa Pulong.

¹⁵¹ Karon, ang si bisan kinsa nga tawo makahimo ra og unsa man nga matang sa mga pagpamahayag. Ug aduna na kita’y ingon-ana sa niining mga adlaw, kon diin daghan na kaayong mga pagpamahayag ang ginapahayag, nga makahahadlok gayud. Apan, nakita n’yo, kung aduna ma’y Kamatuoran, kinahanglan nga pinaagi kini sa Pulong. Tungod kay, ginapamahayag man nila nga aduna kono sila’y tanan na nga matang sa mga butang, mga tawo nga aduna kono’y lana nga nagaagay kanila, ug dugo nga nagagikan sa ilang mga kamot, ug mga babaye nga may dugo kono sa ilang likod, ug nga nagadagayday hangtud sa ilang mga sapatos, ug ipataas lang nila ang ilang mga sapatos ug yaboan kini og lana, ug dunay manggawas ug manglukso nga mga baki ngadto sa entablado, ug tanan na nga matang sa ingon-anang mga butang. Wala gyu’y ingon-anang mga butang sa Biblia. Walay gikasaad og unsa mang butang nga sama niana, sa Biblia. Kini lamang, ang gikaingon, “Sa kaulahiang mga adlaw, ang maong espiritu mamahimong halos magkapareho gayud nga

pagalimbongan niini ang mga Pinili kon mahimo pa.” Pero wala gayu’y Kasulatan para niana.

¹⁵² Apan paghisgotan na ang bahin sa tinuod, walay-sambog nga Pulong sa Dios, nga gipanghimatud-an sa Dios, daw sa ginapakaulawan Niini ang pikas pundok, sa hilabihan nga bahin. Kita n’yo, adunay kaulawan bahin Niini.

¹⁵³ Apan usa Kini ka realidad para sa usa ka lalaki o babaye, batan-ong lalaki o batan-ong babaye, nga usa gayud ka tinuod nga Cristohanon. Sa diha nga gihimo sa Dios ang saad bahin sa bautismo sa Espiritu Santo, ug nadawat mo Kini, aduna gyu’y Butang nga nagapuyo sa sulod nimo, nga walay bisan unsa man ang makapuli sa lugar Niini. Pag mahinagbo gayud sa usa ka tawo ang Dios; dili tungod sa gipakitang emosyon, sa gipakitang kadasig, o tungod sa kung unsang pang-relihiyong doktrina, sa kung unsang katekismo o kredo, o kaha tungod sa dogma nga gidawat niya ingon nga usa—usa ka kahupayan para sa iyang kaugalingon, kondili miabot gayud siya sa dapit nga sama sa kang Moises kaniadto, didto sa luyong bahin sa disyerto, nga nakaduol nawong og nawong atubangan sa Dios nga Makagagahum-sa-tanan, ug makita mo gayud ang Tingog nga nagapakigsulti kanimo, nga tukma gayud sa Pulong ug sa saad alang sa maong panahon, aduna gyu’y butang Kini nga ginabuhat diha kanimo! Kita n’yo, dili mo ginakaulaw Kini, aduna Kini gibuhat diha kanimo. Karon, atong tan-awon karon, sulod sa sunod nga kinse minutos.

¹⁵⁴ Adunay pipila ka mga tawo nga nakadawat na sa ingon-niana nga kasinatian. Ug nagapakigsulti ako kaninyo karon, dili ingon nga usa ka iglesia o ingon nga usa ka denominasyon, nagapakigsulti ako kaninyo ingon nga usa ka indibiduwal; dili tungod kay nagatambong kamo dinhi niini nga tabernakulo, o tungod kay gihigugma ko kamo ug gihigugma ko ninyo, dili tungod niana. Tugoti kong makigsulti kaninyo ingon nga usa ka mamatay ra nga mortal, nga sa umaabot nga adlaw modangat ra kamo sa katapusan niining kinabuhia. Ug tingali’g wala na ko nianang panahona, ug tingali’g bisan ang usa pa ka magwawali. Apan aduna lama’y Usa Nga motagbo kanimo didto, ug kana ang Dios. Ug kamo—magapatalinghug kamo Niini, ug dili tungod nga “ang akong asawa usa ka buutan nga Cristohanon” o—o “ang akong bana usa ka buutan nga Cristohanon,” kondili, “Matarung ba ako sa Dios? Nahinagbo ko ba ang Dios nga sama niana?” Dili tungod kay “nahinagbo man sa akong pastor ang Dios,” o kaha tungod kay “nahinagbo man sa akong diyakono ang Dios,” kondili, “Nahinagbo ko ba gyud Siya?” Dili tungod kay “Nakasinggit ako,” dili tungod kay “Nagsulti man ko og laing mga dila,” kondili tungod kay, “Nahinagbo ko Siya sa personal ingon nga usa ka Tawo!” Kung ingon-ana dili mo gayud igakaulaw Kana, aduna gyu’y kung unsang Butang nga pagka hingpit ug lunsay, ug matuod.

155 Ug timan-i, nga mahimong makatagbo kamo og usa ka espiritu nga magapamuhat sama sa Dios. Mahimong makatagbo mo og espiritu, nga mobuhat og *ingon-niini*, *ingon-niana*, o *uban pa*; medyo panid-i n'yo kini ug tan-awa kung unsa kini ka susama sa Pulong sa Dios. Mahimong makatagbo mo og espiritu nga moingon kaninyo nga kamo luwas na, ug mohatag kaninyo og mahimayaong pagbati, ug mosinggit ug mosiyagit kamo; dayon ginalimod ang Pulong, unsaon man sa Balaang Espiritu, nga nagsulat sa Pulong, nga ilimod ang Kaugalingon Niyang Pulong? Kana nga Espiritu kinahanglan magapunto sa matag saad sa Dios pinaagi og “amen”! Kay kung dili man, nan wala mo gayud nahinagbo ang Dios, ang nahinagbo mo mao ang malimbongon nga espiritu. Ug puno sa ingon niana ang kalibutan karong panahona!

156 Apan pagmakita mo gani ang Dios nga mikanaug ug mihimo og usa ka pahayag, nga pagabuhaton Niya ang usa ka butang, dayon nagaabot ug ginabuhat kana, sa matag karon ug unya, nan aduna ka'y usa ka tinuod nga Espiritu sa Dios.

157 Mahimo ba diay sa Espiritu nga anaa sa usa ka tawo, ang Balaang Espiritu nga misulat sa Biblia, nga talikdan ra ug ilimod, “Dili Kana husto, para man Kana sa uban pa nga panahon”?

158 Miingon Siya, “Ang saad alang kaninyo, ug sa inyong mga anak, sa tanang atua sa halayo, bisan ang kapid-an nga pagatawgon sa Ginoo nga atong Dios.” Mao kana ang Mga Buhat 2:38. Kung ingon-ana madawat ba diay sa usa ka espiritu ang bisan unsa nga lahi kay sa Niana, ug mamahimong iya sa Dios, sa diha nga ang Mga Hebreohanon 13:8 nag-ingon man, “Si Jesus Cristo mao sa gihapon kagahapon, karon, ug hangtud sa kahangturan”?

159 Unsa kaha kung adunay moingon, “Oh, nagatoo ko nga usa Siya ka pilosopo. Siya'y usa ka maayo nga tawo. Siya'y usa ka propeta. Apan kung paghisgotan na ang gahum nga anaa Kaniya. . .”

160 Nagapakig-istorya ako niadtong miaging gabii kang George Smith, ang batan-ong lalaki nga nagapangolitawo sa anak kong babaye, nga si Rebekah; usa ka buutan nga bata, nakakanta na siya dinhi sa tabernakulo. Usa ka batan-ong Baptist nga mibarug gayud . . . miingon, “Tangtanga ang ngalan ko gikan nianang butang! Dili ko gustong magkaaduna og unsa man nga kahilambigitan niana.” Ug may usa ka batan-ong babaye. . . Aduna sila'y pakigpulong, kadtong iglesia nga Baptist, didto sa mga kabungtoran.

161 Ug—ug hugot kaayo ang pagsupak nila kanako, silang tanan didto, ug mahitungod sa dili . . . Wala man gyud sila'y bisan unsa nga maisulti batok kanako; kondili batok ra niining Pulong. Ako, ingon nga usa ka tawo, dili sila makasulti og unsa man

batok kanako, wala man gud ko'y gibuhat nga nakapasakit kanila. Apan *Kana* mao ang ilang gikahadlokan. Kita n'yo? Karon kami . . .

¹⁶² Nagkaaduna sila didto og panagtigum, diay, ug aduna sila, og usa ka misyonaryo nga mao'y manulti sa katapusang tulo ka gabii niadtong daku nga pakigpulong, didto sa mga kabungtoran kon diin mabugnaw. Nahitabo nga, mitindog na kadto nga misyonaryo ug naghigot mahitungod sa Marcos 16, ug miingon siya, “Daghang mga tawo karong panahona nga dili gyud makatoo sa Balaanong pagpang-ayo.” Miingon, “Atua ako sa India sa diha nga ang usa ka tawo nga taga dinhi sa Estados Unidos, nga ginganlan og Igsoong Branham, miabot didto.” Misugod nang dili mapahimutang didto ang pastor. Miingon, “Naghimalatyon na niadto ang akong asawa tungod sa kanser. Usa pud ako ka buta kaniadto,” o mora'g ingon niana. “Nag-ampo siya alang sa matag usa kanamo, ug may usa pa nga gitawag niya gikan sa mga mananambong, nga wala gani nakahibalo sa kaugalingon namong pinulongan, ug nagsulti siya diha sa Gahum sa Dios.” Ug ingon pa, “Ania kami karon, nga nangaayo na!” Bueno, gisulayan nilang pahilumon siya. Wala gyud nila mahimo. Ingon niadto, kita n'yo, didto mismo sa kaugalingon nilang pakigpulong.

¹⁶³ Dayon gilimod nila ang bisan unsa man niadto. Ug ang uban sa maong mga tawo, bisan ang akong . . . ang igsoong babaye niining batan-ong lalaki, didto sila sa maong tigum, wala gani gipasulti og unsa man. Gusto nilang mahibaloan kung dili ba siya konektado, gihimo ang unsa mang paagi nga mahibaloan hibaloan gyud.

Miingon ang usa sa mga babaye, “Bueno, nagatoo ko niana.”

¹⁶⁴ Miadto si Rebekah ug si George aron makigkita niadtong maong babaye. Ug miadto siya ug gidala ang usa ka dalagita nga nagaantus sa usa—usa ka . . . medyo kulang-kulang, diyutay. Busa gipaadto nila ako didto aron makita ang maong dalagita, sa miaging gabii. Ug miadto ko didto, nagalingkod didto ang gamay'ng dalagita, ug ingon ko, “Usa ka ba ka magtotoo?”

¹⁶⁵ Ingon siya, “Dili, wala ko kahibalo kung ako ba'y magtotoo o dili.” Bueno, dili man gyud siya kulang-kulang; usa lang kadto ka espiritu sa yawa. Wala lang nila mahibaloan kadto. Kita n'yo, nagakupot na kini kanimo, ug wala ka lang mahibalo niini. Nagaabot kini, dayon pagadaugon na sa pagka-bayolente ang maong tawo, ug wala nila mahibalo-i kini.

¹⁶⁶ Ngani ang mga kababayen-an nga nagalakaw dinha sa dalan, nga nagasul-ob niining mga short, wala gyud sila mahibalo. Mahimong sila, mahimo nilang pamatud-an ug manumpa pa, nga wala gyud sila nakabuhat og unsa man nga dautan batok sa ilang bana, o uban pa, nga sama niana. Apan

sa ilang kasingkasing, wala nila maamgo, nga gikontrolar na diay sila sa espiritu sa yawa. Nakuptan na sila niini. Nganong gusto man gyud sa usa ka babaye nga huboon ang iyang mga sinina, sa atubangan sa usa ka lalaki? Aduna lang og usa ka tawo nga nagbuhat niana, diha sa Biblia, ug sila'y mga buang. Ginapaninguhaan pud sa uban nga tabonan ang ilang mga kaugalingon; pero wala gyud nila maamgo. Maliputon kini kaayo, malinglahon kaayo! Kinahanglan nga magbantay kamo, timbang-timbanga ang inyong kaugalingon pinaagi sa Pulong sa Dios, ug tan-awa kon asa kamo nagabarug.

¹⁶⁷ Miingon kining batan-ong babaye, “Oh, ila akong giingnan nga nabautismohan na kono ko sa kaniadtong bata pa ako.” Miingon, “Wala ko kahibalo kung motoo ba ko niana nga butang o dili.”

Ingon ko, “Dili mo ba ginatoohan si Jesus Cristo?”

¹⁶⁸ Ug ingon siya, “Bueno, wala ko kahibalo kung nagatoo ba ako o wala.” Ingon pa siya, “Basta sa ingon-niana nga panglimbong nga butang, wala ako nagatoo niana.”

¹⁶⁹ Ingon ko, “Bueno, siyempre, wala ka nagatoo sa mga panglimbong nga mga butang.” Ingon ko, “Apan nagatoo ka ba nga Siya mao ang Anak sa Dios?”

“Oh,” ang ingon niya, “Tingali'g mao Siya.”

¹⁷⁰ Ingon ko, ug ingon pa ko, “Nagatoo ka ba nga Siya mao sa gihapon karon, ang Dios nga makaluwas kanimo?”

¹⁷¹ Ingon siya, “Ang ginapahinungod mo ba kanang mga butang mahitungod sa mga milagro ug ingon-anang butang? Wala ko nagatoo sa bisan unsa man niana.”

¹⁷² Ug ingon ko, “Unsa ma'y imong buhaton kung nagatambong ka sa usa ka panagtigum ug nakita mo ang Dios, ang Balaang Espiritu, nga mao lamang ang bugtong Dios, nga nagapamuhat sa taliwala sa mga tawo; ang Dios diha sa pagka-Amahan, sa Haligi nga Kalayo, ug sa mga propeta; ang Dios diha sa Iyang Anak; ug ang Dios diha sa Iyang katawhan? Mga kinaiyahan lamang kini sa Dios, sa usa ka gamhanang Dios Nga naglangkob sa Eternidad.” Ingon ko, “Unsa kaha kung imong makita Siya, sa taliwala sa Iyang katawhan, gihimo nga—nga makakita ang mga buta, makadungog ang mga bungol, motan-aw diha sa mga mananambong ug sultihan ang mga tawo kung unsay ilang problema, ug sama gayud sa gibuhay Niya sa kaniadtong ania pa Siya sa yuta?”

Ingon siya, “Siguro horoskopyo lang man kana.”

¹⁷³ Ingon ko, “Mas grabe pa man diay ang imong kahimtang kay sa ang pagdahum ko kanimo. Mas maayo pa kung nabuang ka na lang, kita mo, wala ka pa unta'y tulubagon.” Apan ingon ko, “Giulipon ka lang sa usa ka dautan nga espiritu.” Ingon pa ko, “Kaniadtong gisultihan sa Dios ang maong babaye didto

sa atabay mahitungod sa iyang mga bana, kaniadtong gitawag Niya ang mga tawo ug nasabtan ang ilang mga hunahuna, matawag mo lang ba kana nga horoskopyo?” Kita n’yo, nalukob lang gyud sa usa ka denominasyon, nga gitawag og Lutheran, nga ang unsa mang butang nga sukwahi niana sayup!

¹⁷⁴ Karon gusto sa Dios mao ang tawo nga nalukob sa Pulong. Ang unsa mang butang nga sukwahi Niana sayup! Miingon si Jesus, “Ang matag Pulong sa tawo bakak, ug ang sa Ako mao’y Kamatuoran.”

¹⁷⁵ Adunay usa ka tawo kaniadto sa usa ka siyentipikanhon kaayo nga kapanahonan, nga ginganlan og Noe. Wala niya gikaulaw ang Pulong sa Dios. Gitagbo siya sa Dios, ug nagpakigsulti Siya ngadto kaniya. Hingsayran niya nga ang Dios kadto. Ug miingon ang Dios, “Magaulan!” Wala gyud nag-ulan kaniadto, apan gitoohan niya nga moulan gayud. Ug tungod sa pagtoo nga aduna siya, wala gyud niya gikaulaw nga i-aplikar kadto. Giabot siya og usa ka gatus ug baynte ka tuig sa pagbuhat sa arka, bisan ang kalibutan batok gyud kaniya. Wala niya gikaulaw ang Pulong sa Dios, sa iyang adlaw. Giluwas siya sa Dios ug ang iyang panimalay usab, tungod niadto. Adunay usa ka . . . Daw sa unsa tingali ka hangal kadto para sa ubang mga tawo; apan, para kaniya, nahinagbo gyud niya ang Dios. Bisan unsa pa ka siyentipikanhon ang uban kaniadto, nga sukwahi gayud, bisan unsa pa nila sa pagsulti “dili kana puedeng mamahitabo, dili kana mamahitabo,” pero nahinagbo gyud niya ang Dios!

¹⁷⁶ Ingon niana kini pag nasayod ka nga nagapakigsulti ka Kaniya! Mahimong maghunahuna ka nga usa kini ka binuang nga butang pag may tawong. . . Bisan pa, nasayod ko nga aduna gyu’y pipila ka mga tawo sa kalibutan nga nagapanghawid sa kung unsay akong ginasulti nga mao ang Kamatuoran. Ang mobarug dinhi ug moingon, “MAO KINI ANG GINAINGON SA GINOO, moadto ako sa Arizona, og didto mahinagbo ko ang pito ka Manulonda nga nag-panon,” bueno, adunay pundok sa mga kalalaken-an ang nagatindog didto aron makita nga mahitabo kadto. Niadtong miaging gabii, gisulti ko kini, “Maunlod ang Los Angeles ngadto sa kadagatan.” Apan pag nahinagbo mo ang Dios, ug ang Dios Nga dili mapakyas, ang Dios Nga eksaktong ginatuman kung unsay giingon Niya nga Iyang pagabuhaton, ingon nga kanunay Niya kining ginabuhat, nan dili mo ginakaulaw kana. Dili mo kinahanglan moatras ug maulawan bahin niini; mahimo mong sultihan ang tibuk kalibutan. Pag natagbo sa usa ka tawo ang Dios, nakapakigsulti Kaniya, ug ang realidad sa Dios maanaa kaniya sulod sa iyang kasingkasing, dili gyud niya igakaulaw Kini.

¹⁷⁷ Wala naulaw si Noe kaniadto. Bisan nga daw sa hinangal ra kadto para sa tanang uban pa sa kalibutan, apan para kaniya dili gayud.

178 Si Moises, sa dihang atua siya sa atubangan ni Faraon, wala siya naulaw nga sultihan si Faraon nga mahitabo ang ingon-niining mga butanga, tungod kay nahinagbo man niya ang Dios. Gisultihan na siya sa Dios, didto sa nagadilaab nga kahoy'ng talongon. Miingon si Moises, "Ako—nagabungabunga man ako." Ingon niadto siya, usa ka nagabungabunga sa pagpamulong.

179 Miingon ang Dios, "Anaa man si Aaron. Mamahimo ka nga Dios para kaniya, ug mamahimo siya nga propeta para kanimo. Nasayod Ko nga maayo siyang manulti. Apan magauban man Ako sa imong baba. Kinsa man diay ang naghimo sa tawo nga makasulti?" Amen. Gusto ko kana. Ang Dios. "Kinsa man ang naghimo sa tawo nga mamahimong bungol o amang, o kinsa man ang naghimo sa tawo nga makasulti?" Ang Dios gayud.

Ingon siya, "Ginoo, ipakita kanako ang Imong himaya."

Giingnan siya, "Unsa man kanang anaa sa imong kamot?"

Ingon siya, "Usa ka sungkod."

180 Giingnan siya, "Iitsa kana sa yuta," og nahimo kini nga usa ka bitin. Giingnan pa, "Punita kana pag-usab," og balik kining nahimo nga usa ka sungkod. Amen. Dios Siya. "Isulod ang imong kamot sa imong dughan." Gisulod niya kini, og sa gikuha na kini, namuti kini tungod sa sanla. Giingnan siya, "Isulod kana balik ug kuhaa kana pag-usab," ug sama na kini sa usa pa niya nga kamot. "Ako ang Dios."

181 Dayon miduol na siya sa atubangan ni Faraon ug gisulti kung unsay giingon sa Dios nga iyang igasulti. Miingon siya, "Mahitabo gyud ang *ingon-niini* ug *ingon-niini*." Nagpudyot siya og balas ug isabwag kini sa hangin, ug miingon, "MAO KINI ANG GINAINGON SA GINOO, magapanungha ang mga pulgas ibabaw sa yuta," ug nanungha ang mga pulgas. Nagkuha pud siya og tubig ug gibubo kini ngadto sa sapa, ug miingon, "MAO KINI ANG GINAINGON SA GINOO," ug ang tibuok kasapaan ug tanan-tanan na nangahimo gayud nga dugo. Nagtawag pa siya og ulan nga yelo nga nangahulog gikan sa langit.

182 Kabalo na mo, nga sa kaulahiang mga adlaw mahitabo pag-usab ang ingon-niana nga mga hampak. Ug hinumdumi, nga ang usa ka mananapaw, niadtong panahon sa Biblia, kamatayon ang iyang silot pinaagi sa pagbato. Ug ang dili-nagatoo nga iglesia pagabatohon pud hangtud mamatay, pinaagi og mga bato nga yelo, nga mao kaniadto ang paagi sa Dios sa pagsilot. Pagabatohon Niya kining dili-nagatoo nga kalibutan, kining mananapaw nga kaliwatan. Pagabatohon Niya kini gikan sa langit, pinaagi og mga bato nga yelo nga may gibug-aton nga usa ka talanton kada usa, nga usa ka gatus ka libra. Mamatay gayud ang mananapaw nga iglesia, mamatay ang mananapaw nga kalibutan ilalum sa silot sa Dios, pinaagi sa pagbato, sama sa gibuhat Niya kaniadto sa sinugdanan. Magpakatul-id sa Dios,

iglesia! Mao kana ang kinahanglan natong pagabuhaton, ang mobalik sa Dios!

¹⁸³ Kadtong tigulang na nga balbason ang nawong, nga ubanon na ang mga bangas, opaw, og nagkunot na ang mga bukton, kadtong otsenta-anyos nga si Elias nga nagalingkod didto sa kamingawan, nga nagalantaw sa mga kasal-anan sa mga tawo. Nakigsulti ang Dios ngadto kaniya usa niana ka buntag, giingnan siya, “Umadto ka didto ug suginli si Ahab nga walay bisan tun-og nga mahulog gikan sa langit hangtud nga igasulti mo kini.”

¹⁸⁴ Makita ko nga nagalantaw ang gagmay niyang mga mata gikan sa ilalum niadtong labong og ubanon na nga balbas, nagguni niadtong sungkod, nga nagalakaw sa dalan sama sa usa ka dise-sais-anyos nga batan-ong lalaki. Milakaw siya padulong sa atubangan sa maong hari, ug miingon, “Walay bisan yamog nga mahulog gikan sa langit hangtud nga igasulti ko kini.” Wala niya gikaulaw ang Dios o ang Iyang Pulong; nga sultihan ang usa ka hari o si kinsa man. Wala gyud siya naulaw. Dili niya kinahanglang motago, nga moingon, “Karon, Ahab, mamahimo kang usa ka . . .”

¹⁸⁵ Nagpahinumdom kini kanako mahitungod sa atong mga kaugalingon. Dayon miingon ako sa mga tawo, “Nagaabot na ko sa usa ka punto, nga nagkinahanglan ko og dugang pa nga pagtoo.” Mao kana’y hinungdan kon nganong mibalik ako karon aron makabaton og usa—usa ka bag-ong pag-ulbo sa pagtoo.

¹⁸⁶ Daw, sama ra kini, pag mag-ampo ka para sa mga tawo, mangayo ka og pasaylo, “Mr. Yawa, mahimo mo bang magpadaplin ug tugotan akong . . .?” Wala gyu’y mahitabo niana! Adunay mga muskulo ang pagtoo, ug balhibo sa dughan niini. Pagmosulti kini, manghilum na ang tanang uban pa. Dili ingon nga, “Mr. Yawa, puede ka bang mogawas?”

¹⁸⁷ “Gumawas ka dinhi! Usa ako ka anak sa Dios, nga sinugo sa Dios. Humawa ka!” Ingon niana maghingilin. Wala ka nagapangayo og katahuran sa yawa, wala ka’y kahilambigitan kaniya. Wala mo ginakaulaw ang Pulong sa Dios, wala mo ginakaulaw ang imong sugo, wala mo ginakaulaw kung kinsa kita.

¹⁸⁸ Ang ginakaulaw ko lang, mao nga usa ako ka Branham, kana ang pagkahimugso ko dinhi sa yuta. Ginakaulaw ko ang akong mga kapakyasan.

¹⁸⁹ Apan ingon nga Iyang alagad, wala ko ginakaulaw kana! Wala ko ginakaulaw ang Iyang Pulong. Bisana unsa pa nga mga denominasyon, mga hari man, mga gamhanan, o unsa pa man kini; andam gyud ko nga mohatag og tubag, kana ang gikinahanglan sa Dios.

¹⁹⁰ Miduol si Moises sa atubangan ni Faraon kaniadto. Wala siya naulaw nga sultihan siya nga dili sila mopakig-kompromiso ug

dawaton ang iyang *ingon-ka-daghan* lang nga mga adlaw didto sa kamingawan.

Ang ingon ni Faraon, “Magpabilin ang pipila sa mga kababayen-an, ang uban sa inyong mga anak.”

¹⁹¹ Miingon, “Manglakaw kaming tanan! Walay mahibilin bisan gani usa ka kuko lang sa mananap, dad-on namo ang among mga kabakahan ug tanan-tanan.” Wala siya naulaw. Ngano man? Nahidangat na man siya ngadto sa Kahayag sa pagtubos.

¹⁹² Mao kana’y hinungdan nga ang usa ka lalaki o usa ka babaye, nga masakiton o unsa man, pagnakasulod sila sa Presensiya sa Dios, ug nasayod nga giayo na sila sa Dios, nakasulod gyud sila ngadto sa Kahayag sa kagawasan. Wala ka gyud nagapakig-kompromiso sa unsa mang butang.

¹⁹³ Anaa na ang kagawasan sa iyang kasingkasing, tungod nga nahinagbo na man niya ang Dios Nga miingon, “Ako mao ang Dios ni Abraham, Nga mao ang naghatag sa saad kang Abraham. Ug ang panahon, ang panahon sa katubsanan, ang panahon sa kagawasan, haduol na. Ginasugo Ko ikaw didto aron ipahigawas sila.” Unsa ma’y angay’ng ipangayo og pasaylo, mahitungod niana?

¹⁹⁴ Puede siyang patyon ni Faraon. Yanong tawo ra man siya. Usa ra siya ka ulipon. Mahimo siyang patyon ni Faraon. Apan wala gyud niya gikaulaw ang Pulong. Wala siya miadto didto ug miluhod ug nagpakilooy kang Faraon alang sa bisan unsa man. Ingon siya, “Mianhi ako aron pagakuhaon sila.”

Ang ingon ni Faraon, “Bueno, dili mo sila puedeng kuhaon!”

¹⁹⁵ Ingon siya, “Sige, kung ingon-ana magapanungha ang mga pulgas ibabaw sa yuta, hangtud kinahanglan mong moubog kanila aron makaagi lang.” Ug mao gayud kadto ang nahitabo.

Giingnan, “Oh, Moises, papahawaa ang mga niini!”

Miingon, “Sige. Karon nagbasol ka na ba?”

Giingnan, “Bueno, mahimo na kamong moadto sa kamingawan sa *pila-ka* mga adlaw.”

¹⁹⁶ Ingon siya, “Kung ingon-ana langaw na man ang magapanungha.” Amen. Ingon pa, “Motungha pud ang kangitngit.” Pagkangitngit kaayo kaniadto nga dili mo na makita ang usa ka dapit gikan sa usa pa.

¹⁹⁷ Ug sa katapusan kamatayon ang miabot. Gikan sa kang Faraon hangtud sa iyang sulugoon, kamatayon ang miabot sa kinamagulangan nga anak sa pamilya. Walay pasaylo-pasaylo kadto sa kang bisan kinsa man. Si Moises usa ka anak ni Abraham, natawo diha sa Espiritu sa Dios, nga gikahatagan og sugo sa Dios, gikahatagan og Mensahe sa Dios, nga moadto didto ug ipahigawas ang mga tawo.

198 Bueno, dili ba makahimo man pud ang Dios sa pagtawag sa mao gihapong butang niini nga panahon, nga magpahigawas gikan sa iglesia og usa ka Pangasaw-onon? [Nagaingon ang kongregasyon, “Amen.”—Ed.] Wala si Daniel, o . . .

199 Si David, diay, wala siya nahadlok kaniadto sa atubangan ni Saul. Sa dihang nangahadlok ang tanan kang Goliath didto, wala siya nahadlok nga moduol didto. Ug miingon, “Ang imong sulugoon . . .” Miingon kining gamay’ng-niwang nga bata, “Sa diha nga nagabantay ang imong sulugoon og mga karnero sa iyang amahan, ug dihay miabot nga usa ka oso ug gitangag ang usa sa maong mga karnero. Gigukod ko kini ngadto sa kamingawan ug gipatay kini, pinaagi ra niini nga lamboyog. May miabot pud nga usa ka leon.” Oh, grabe! “Miabot ang usa ka leon ug gitangag ang usa na usab sa mga karnero, ug midagan ngadto sa kamingawan, ug gitumba ko kini pinaagi sa usa ka lamboyog. Sa pagbangon na niini, gipatay ko kini.” Ingon pa siya, “Ug ang Dios . . .” Nagatindog ra kadtong nag-backslide na nga hari didto, kadtong mahuyang nga mga sundalo nga nagaingon nga nagapangalagad kono sila sa Dios sa Langit, ug tugotan ra kadtong dili-tuli nga Filistihanon nga motindog didto ug hagiton ang mga kasundalohan sa buhing Dios. Miingon, “Pagapatyon siya usab sa imong sulugoon. Kay, ang Dios Nga naghatag na mapatay ko kadtong leon ug oso, maoy magahatag usab aron mapatay ko kanang dili-tuli nga Filistihanon.” Wala siya nagbungabunga, og wala miingon, “*tingali’g* mamahimo ra kini.” Ang ingon niya, “Mamahimo gyud kini!” Wala siya naulaw.

200 Si Daniel pud, sa atubangan sa hari, wala siya nahadlok nga supakon ang mga sugo niini nga walay si kinsa man ang mag-ampo, kondili ngadto sa maong hari lamang. Giablihan pa niya ug gipataas ang marko sa mga bintana, ug nag-ampo sa makatulo ka higayon sa usa ka adlaw. Wala siya nahadlok.

201 Si Sadrac, Mesac, ug Abednego, wala gyud sila nahadlok niadtong nagdilaab nga hudno. Nanag-ingon, “Ang among Dios makahimo man sa pagluwas kanamo. Mahimo kaming luwason sa Dios. Apan kung dili man Niya buhaton, dili gihapon kami moyukot nganha sa imong imahe.” Wala nila gikaulaw kadto. Wala, sir. Wala, sir. Wala gayud nila gikaulaw kadto, tungod kay nasayod man sila.

202 Wala pud naulaw si Samson kaniadto atubangan sa mga Filistihanon. Sa diha nga gigukod siya sa usa ka libo, gipunit ra niya ang bukog nga apapangig sa mula. Ug kadtong mga salukot nila, halos usa ka pulgada ug tunga ang kabagaon niadto, nga mga hinimo sa tumbaga. Gipangbunalan niya ang usa ka libo pinaagi niadto, ug gigunitan niya sa gihapon ang maong bukog nga apapangig sa iyang kamot. Wala siya naulaw. Gigamit lang niya kung unsa ang anaa sa iyang mga kamot, ug nakigbugno nga gamit kadto. Hingsayran man niya nga ang Espiritu sa Dios

anaa kaniya. Hingsayran niya nga natawo siya ingon nga usa ka Nazareo. Hingsayran niya nga wala gyu'y unsa man ang makababag kaniya. Usa siya ka alagad sa Dios. Samtang nga anaa siya sa kabubut-on sa Dios, walay unsa man ang mahimong mobabag diha sa iyang dalan, bisan pila pa ka mga hari o mga Filistihanon, o unsa pa man ang moabot. Husto.

²⁰³ Wala usab gikaulaw ni Juan ang Pulong sa Dios nga miabot kaniya didto sa kamingawan, ug nagsulti kaniya nga moadto og magbautismo sa tubig. Wala siya naulaw nga moingon, “Tan-awa ang Cordero sa Dios nga nagakuha sa sala sa kalibutan,” tungod nga ang Espiritu sa Dios anaa man kaniya. Wala siya naulaw atubangan sa mga sacerdote.

²⁰⁴ Wala niya gikaulaw ang Pulong sa Dios sa diha nga miadto siya kang Herodes. Nakigpuyo man kaniadto ang asawa ni Felipe uban kang Herodes. Miadto siya mismo sa atubangan sa maong hari! Kining tigulang tawo nga balhiboon-ang-nawong nga gikan pa didto sa kamingawan, migula kini gikan didto, nga wala man lang og edukasyon o unsa mang uban pa, ug miadto mismo sa atubangan ni Herodes, ug miingon, “Dili uyon sa balaod alang kanimo nga pangasaw-on siya!” Wala niya gikaulaw ang Pulong sa Dios. Oo. Bug-os gyud niyang wala gikaulaw Kini.

Si Esteban, wala pud niya gikaulaw ang Pulong sa Dios.

²⁰⁵ Kaniadto, ang mga tawong Pentecostal didto sa Adlaw sa Pentecostes, sa dihang nagkatigum sila didto sa hataas nga lawak, mikunsad kanila ang Espiritu Santo, sumala sa saad sa Dios. Miingon ang Lucas 24:49:

. . . tan-awa, igapadala ko kaninyo ang saad sa akong Amahan nganha kaninyo: apan paghulat una kamo . . . sa siyudad sa Jerusalem, hangtud nga madawat ninyo ang gahum gikan sa kahitas-an.

²⁰⁶ Ug ang mismong saad nga gikasaad sa Pulong sa Dios ngadto kanila, “Ani karon, igapadala Ko kaninyo ang saad sa Akong Amahan nganha kaninyo, apan paghulat una kamo dinha; ayaw kamo pagbaton og unsa man nga teolohiya o edukasyon, ug uban pa, paghulat lang hangtud nga masul-oban kamo og Gahum.” Ug sa miabot na ang Gahum gikan sa Langit, nga sama sa usa ka nagahaguros nga makusog nga hangin, wala nila gikaulaw ang Maayong Balita.

²⁰⁷ Mitindog si Pedro, og miingon, “Paghinulsol kamo, ang matag usa kaninyo. Kamong mga tawo, nga may dautang mga kamot, inyong gilansang sa krus ang Prinsipe sa Pakigdait, nga gibanhaw sa Dios gikan sa mga patay. Ug mga saksi kami. Kay kini man mao ang giingon na ni Joel nga mamahitabo sa kaulahiing mga adlaw, ‘Igabubo Ko ang Akong Espiritu sa tanang unod.’” Wala niya gikaulaw ang Maayong Balita.

208 Ang gamay'ng si Esteban, nahisgotan ko siya kaganina lang, sa pag-agi niya didto nga sama sa usa—usa—usa ka alimpulos. Dili siya usa ka magwawali. Siya'y usa ka diyakono lamang, apan nagpamatuod siya sa bisan asa mahitungod sa pagkabanhaw. Nahinagbo man niya ang Dios. Ug sama lang kini. . .

209 Sulayan mong pahunongon siya? Bueno, sama lang kini sa pagpaningkamot nga ipahimutang ang usa—usa ka balay, ang usa ka nagakasunog nga balay, nga palongon ang kalayo niini, atol sa mahangin nga adlaw, og sa mainit nga panahon. Aba, sa matag higayon nga mohaguros ang hangin, samut nga ginapakaylap niini ang kalayo.

210 Giguyod siya aron ipaatubang didto sa Konseho sa Sanhedrin. Mahunahuna n'yo ba kung unsa kana? Sama ra kana sa Ekumenikanhong Konseho. Ang tanang relihiyon mopaingon, og mapailalum gayud sa Ekumenikanhong Konseho. Silang tanan kaniadto mipaingon pud didto og napailalum sa Konseho sa Sanhedrin. Mga Fariseo, mga Saduceo, mga Herodian, o unsa pa man sila, kinahanglan sila mapailalum niadto nga konseho. Ug gidakup nila siya, dili nga sa usa ra ka organisasyon, kondili gidakup siya sa mao mismong dakung konseho. “Hadlokon nato siya og ayo.”

211 Sa pag-adto niya didto, niadtong buntaga, miingon ang Biblia nga ang iyang nawong mora og iya sa usa ka Manulonda. Miingon siya, “Mga katawhan ug mga igsoon, tugoti kong mosulti kaninyo. Nagpuyo ang atong mga ginikanan sa Mesopotamia sa wala pa sila miabot sa Haran,” og sa asa pa. Mipadayon siya ug gikutlo ang mga Kasulatan. Dayon sa diha nga nadihogan na siya og ayo, mikunsad kaniya ang Espiritu, miingon siya, “Kamong mga tikig og liog, mga walay-sirkunsisyon sa kasingkasing ug sa mga igdulongog, kanunay ninyong ginabatokan ang Espiritu Santo; sama sa gibuhat sa inyong mga ginikanan, mao man usab ang inyong ginabuhat.” Wala niya gikaulaw ang Maayong Balita, wala niya gikaulaw ang Pulong. Wala siya naulaw atubangan sa Konseho sa Sanhedrin. Wala.

212 Nakigsulti si Pablo sa atubangan ni Agripa kaniadto. Ingon nga usa ka Judeo, nga gikatudloan ilalum ni Gamaliel, usa siya ka ilado nga tawo. Apan usa niana ka adlaw, didto sa dalan paingon sa Damascus, nahidangat siya sa Presensiya, og natagbo niya ang Dios. Mikunsad ang usa ka Manulonda gikan sa Langit, sa porma sa usa ka Haligi nga Kalayo, usa ka Kahayag nga miigo kaniya og natumba siya sa yuta. Mibangon siya, ug miingon, “Ginoo, Kinsa Ka man?”

Ug miingon Siya, “Ako mao si Jesus.”

213 Pagtindog niya didto sa atubangan ni Agripa, gisugilon niya pag-usab ang maong estorya. Miingon siya, “Dili ko igakaulaw

ang Maayong Balita ni Jesus Cristo, kay Kini mao ang Gahum sa Dios alang sa kaluwasan, sa matag usa nga nagatoo.” Sigurado.

²¹⁴ Karon, mga higala, mopadayon pa unta kita sa mga tawo, sa tanang mga nangaging kapanahonan, pero wala na man kita’y oras.

²¹⁵ Apan tugoti kong isulti kini. Ang tawo nga sa makausa nakapakigtagbo na sa Dios, nga mao ang Pulong, ug napatinaaw ug nahipadayag gayud ang Pulong kaniya, nan wala gyu’y angay nga ikaulaw mahitungod niana. Dili ka maulaw. Wala nako ginakaulaw nga isulti nga ginatoohan ko ang matag Pulong sa Dios. Wala nako ginakaulaw nga pagmay ginaingon ang Dios nga angay kong isulti, moadto ako og isulti kini ug buhaton kini; wala nako ginakaulaw nga isulti nga puno ako sa Espiritu Santo; wala nako ginakaulaw nga isulti nga nagsulti ako’g laing mga dila; wala nako ginakaulaw nga isulti nga ang atong Ginoo nagpakita kanako og mga panan-awon; wala nako ginakaulaw nga ipahayag nga Siya mao sa gihapon kagahapon, karon, ug hangtud sa kahangturan.

²¹⁶ “Sa diha nga pagataralon na kamo sa atubangan sa mga magmamando ug sa mga hari, tungod sa Akong Ngalan, dili kamo magkaguol kung unsa ang inyong igasulti, kay igahatag ra kini kaninyo nianang taknaa. Dili kamo mao ang magasulti, kondili ang Akong Amahan nga nagapuyo sulod kaninyo. Apan ang si kinsa man nga magakaulaw Kanako ug sa Akong Pulong, niining henerasyon, igakaulaw Ko siya sa atubangan sa Akong Amahan ug sa balaan nga mga Manulonda.” Hinaut nga tabangan kita sa Dios nga dili na mangaulaw, ug tabangan kita nga mamahimong usa ka buhing saksi.

²¹⁷ Ang matag tawo sa Daang Tugon, sa diha nga silang mga propeta nangabot, nahimo silang—nahimo silang buhi nga Pulong. Sila mao ang Pulong. Miingon si Jesus nga gitawag sila nga mga dios, ug sila mao man, tungod kay ang Pulong sa Dios miabot man kanila. Nagaingon sila, “Kini’y MAO KINI ANG GINAINGON SA GINOO.”

²¹⁸ Ug ang si kinsa man nga tinun-an ni Cristo nga natagbo Siya diha sa katubsanan, ug miabot ang kaluwasan sulod sa iyang kasingkasing, siya’y usa na ka tigpanag-iya sa Dios. Ug kung unsa na nga matang sa kinabuhi ang kinahanglan natong ikinabuhi, ug kung ginaunsa na nato sa paglakaw, ug ginaunsa na nato sa pagpakig-istorya, kung ginarepresentar sa Dios ang Iyang Kaugalingon pinaagi sa kaugalingon natong mortal nga mga lawas? Kinsa man ang magakaulaw niana?

²¹⁹ Kung ako miabot man sa punto nga nahimong miyembro sa puwersa sa kapulisan dinhi sa Jeffersonville, nga magalakaw-lakaw sa dalan, nga may bug-os nga awtoridad, dili ko ikaulaw ang maong siyudad. Kabahin man ako sa siyudad. Usa ako ka pulis, nga kabahin sa maong siyudad, aron imintinar ang

kahan-ayan ug ang balaod. Kung nagpadagan man ang usa ka tawo nga nakapula pa ang suga, dili gyud ko maulaw'ng sultihan siya nga nakabuhat siya og sayup, og tiketan siya. Katungdanan ko kana, tungod kay ako—ginasuwendohan man ko sa siyudad. Nanginabuhi man ako sa siyudad. Aduna pud ako og awtoridad gikan sa siyudad. Bisan pa kung hubog ang tawo, o kung unsa ma'y nabuhat niya, pagasuportahan gyud nila ako. Pagabarugan ko ang akong mga katungdanan, tungod kay usa man ako ka pulis ug gi-. . .gi-ordena ako, o gipahimutang dinhi ug gihatagan og awtoridad nga buhaton kini. Gikalaligan ka nga masiguradong nasunod ang balaod ug ang mga katungod, ug uban pa, ug siguradohon nga nabuhat kana sa husto.

²²⁰ Nan, kung ako ma'y usa ka Cristohanon ug napuno sa Espiritu, nga nagasul-ob sa pagpamatuod sa pagkabanhaw ni Jesus Cristo, nga Siya mao sa gihapon kagahapon, karon, ug hangtud sa kahangturan, ayaw tugoti nga tukmod-tukmoron ka lang sa ni kinsa man nga yawa, og moingon, "Ayaw buhata ang *ingon-niini* ug ayaw buhata ang *ingon-niana*." Buhata Kini mismo. Gihatagan na kamo sa Dios og. . .

²²¹ Kita n'yo, wala man kita'y gahum. Wala pu'y gahum ang maong pulis sa pagpahunong sa sakyanan. Kini'y halos. . . usahay adunay tulo o upat ka gatus ka horsepower ang makina niini, og unsa ma'y iyang mahimo niana? Apan aduna siya'y awtoridad.

²²² Ug ingon niana usab ang Iglesia. Aduna kita'y awtoridad, tungod sa pagkabanhaw ni Jesus Cristo ug tungod sa Iyang gisaad nga Pulong, alleluyah, "Ang mga butang nga Akong ginabuhat inyo usab pagabuhaton; mas daghan pa kay sa niini ang inyong pagabuhaton, kay moadto man Ako sa Amahan."

²²³ Ayaw ninyo ikaulaw Siya sa niining henerasyon; nga makasasala, nangalibog, ang kaulahiing henerasyon nga maanaa ibabaw sa yuta, kining makasasala, mananapaw, ug puno sa tanang nagakadugtang samad. Ang tanan, ang tanan-tanan nga maligdong nangahimo na gayud nga pagka-mahilas. Ang nasudnong pulitika, grabeng kahugawan! Nangadaut na ang mga nasud.

²²⁴ Didto sa masiot nga mga kalasangan sa Africa, ang mga mangangayam didto, siguradohon nilang may dala sila og high-powered nga mga radyo aron lang makadungog kang Elvis Presley, Pat Boone, ug sila nga mga kalalaken-an nga dala kanang mga rock-and-roll ug twist. Ug ang mga lumad usab didto, makita sila nga nagalihok nga ingon-niana, ginayango-yango ang ilang ulo ug nagalihok nga sama niana, manindog lang ang mga lumad ug gitan-aw sila. Apan, nakita n'yo, dili baya sila mga Amerikano nga sama ni Pat Boone, ug ni Elvis Presley, ug ni Ricky Nelson, ug unsa pa kadto nga mga kalalaken-an. Dili man pud sila ingon niana nga matang sa mga Judas, apan sila'y. . .

Kita n'yo, espiritu kini. Ug ang maong espiritu dili lamang sa Amerika, mikaylap na kini mismo sa tibuok kalibutan, aron dad-on sila ngadto sa gubat sa Armageddon. Nanaglihok na sila nga sama niana, kung sila ma'y mga . . . Bisan pa og taga asa sila nga nasud, Africa, India, asa man kini, mikaylap na gyud ang ingon-ana nga kalaw-ayan ug ingon-anang mga butang sa tibuok kalibutan, tungod sa usa ra ka tawo nga nagpasugod niini.

²²⁵ Mao man usab ang Maayong Balita ug ang Gahum sa Dios nga Makagagahum-sa-tanan, nga mikaylap na pud sa tibuok kalibutan! Ug nagakahitabo na karon ang panahon sa pagpanglain, sa diha nga ginatawag na sa Dios ang Pangasaw-onon, ug ginatawag pud sa yawa ang usa ka iglesia. Hinaut nga mamahimo akong kabahin sa maong Pangasaw-onon!

Mag-ampo kita.

²²⁶ Minahal nga Dios, makita na namo ang sinulat-sa-kamot diha sa bungbong, Ginoo. Ania na kami sa katapusang panahon. Nasayod kami nga aduna gyu'y dagkung umalabot nga mga butang, apan bisan pa man niini, sa kon asa man sa tunga niining mga kagubot, aduna sa gihapon og matinud-anon nga mga tawo nga gitagana-nang-daan ngadto sa Kinabuhi. Mahimong imposible kini para sa usa ka tawo o duha ka tawo; apan, Dios, kaming tanan, tugoti kaming mapakaylap sa matag kanto nga mahimo namo, ang maayong balita nga moabot na si Jesus, ug, makita, nga naipakaylap gayud ang diyutay'ng Tinapay, ang diyutay'ng Pulong. Kung asa man ang mga Agila, pagasundon nila kana nga Pagkaon. Kung moabot man Kini pinaagi sa teyp, o kung moabot man Kini pinaagi sa pagpamulong o sa pagtestimonyo, pagasundon gyud Kini sa mga Agila ngadto sa punoang-buhatan Niini. Kay Kini nahisulat na, "Diin gani ang Gipatay'ng-Lawas, atua didto magakatapok ang mga Agila." Minahal nga Jesus, nasayod kami nga Ikaw mao ang Gipatay'ng-Lawas nga among ginakaon. Ikaw mao ang Pulong, ug ang Pulong nahimong unod ug nagpuyo ipon kanamo. Nagaampo kami, Dios, nga samtang ginapakaylap namo ang Pulong, hinaut nga makakaplag Niini ang tinuod nga mga Agila.

²²⁷ Dili kami maulaw pagmotindog kami atubangan sa mga tawo, nga mga dautan, walay-pagtagad nga mga tawo, mga relihiyoso, og unsa pa man. Sama sa gikaingon ni Pablo kang Timoteo:

. . .Magkugi kita sa panahon, ug sa dili panahon; magbadlong ka, ug magsaway ka, ug . . . uban sa bug-os nga pagkamapailubon ug pagpanudlo.

Kay moabot ang panahon nga dili sila molahutay sa maayong pagtulon-an; kondili uyon sa ilang mga kailibgon. . . magatigum sila sa ilang mga kaugalingon og mga magtutudlo, sa may mga dalunggan nga gikatlan;

Ug manghisalaag . . . gikan sa kamatuoran, . . . ngadto sa mga sugilanon lamang.

228 Dios, nagapuyo na kami sa niana nga panahon. Gitugotan Mo ako nga mabuhi sa igong gidugayon aron makita kana nga mahitabo. Ingon nga, napahimutang na kana dinhi mismo sa ulohang bato niining tabernakulo, trayntay-tres na ka tuig ang milabay.

229 Dios, panalangini ang matag usa nga ania dinhi. Kung aduna ma'y usa dinhi, Ginoo, nga dili pa andam nga makigtambo Kanimo, nga dili gayud nila mahimong mouyon sa Imong Pulong, ug wala Ka pa nila nahinagbo sa nawong og nawong ug wala pa mahibalo nga dili Ka maila pinaagi sa kung unsa nga pakitang-buhat lamang nga matang sa—sa—sa pagdawat, sama sa pagdawat og kredo o mga ingon-niana, kondili nga mahinagbo gayud ang buhi nga Dios; ug kung wala pa man nila nabuhat kini, Ginoo, hinaut nga buhaton na nila kini karon mismo.

230 Ako—nagatoo ko nga Ikaw—Ikaw haduol gayud niining taknaa. Wala ako mahibalo kung kinsa man sila. Wala gani ako mahibalo kung aduna ba'y kinsa man dinhi, apan nabati ko gayud nga gipangunahan ako nga mag-ampo Kanimo. Dili aron nga madungog ako sa mga tawo, tungod kay usa kana ka hipokrito nga buhat. Dili unta itugot sa Dios. Dili ko gusto nga mamahimong usa ka hipokrito. Apan ginaampo ko kini nga may pagkamatinuuron sa akong kasingkasing, Ginoo.

231 Kung si kinsa man nga lalaki o babaye ang Imong gikaestorya karong buntaga, hinaut nga mapainubsanon gyud sila nga dili maulaw, kondili sa kinasuloran sa ilang kasingkasing pagadawaton Ka nila karon, nga manganhi sila unyang gabii aron mabautismohan sa Ngalan ni Jesus Cristo, nga ginasunod ang matag Pulong, ang matag Pulong gayud; kung gikabautismohan man sila sa lahi nga paagi, o giwisik-wisikan ba kaha, o gibuboan. Mahinumduman (among mahinumduman, Ginoo) nga miingon Ikaw, “Ang si kinsa man nga magataktak og usa ka Pulong gikan sa Basahon, o magadugang og usa ka pulong ngadto Niini, pagataktakon ang iyang bahin gikan sa Libro sa Kinabuhi.” Bisan pa nga nagapaningkamot siyang, sa pagtambong, ginalista ang iyang ngalan sa libro, dili gyud kana—kana magpulos. Itugot nga magmatinud-anon ug magmapainubsanon kami.

232 Karon anaa na sila sa Imong mga kamot, Ginoo. Mamuhat Ka kanila sumala sa Imong makita nga angay'ng buhaton, kay Imo man sila. Sa Ngalan ni Jesus Cristo, nga Anak sa Dios.

233 Karon samtang giduko nato ang atong mga ulo, gusto ko nga mamalandong kamo nga seryoso karon. Mangayo ko og pasaylo, una, tungod nga nasobra ako og mga kinse minutos. Karon gusto natong maglaylay. Ug palandunga lang ninyo sa

inyong kasingkasing karon, “Nahinagbo ko na ba gayud ang Dios?” Palandunga lang kini nga matinuuron karon. Tungod kay, mahimong dili na gayud magkaaduna pa og daghang mga higayon tingali’g hangtud. . . Tingali’g kini na ang katapusang higayon karon, nga magkita kita sa dili pa ang Iyang Pag-abot. Haduol na gyud, mga higala. Ang matag Kasulatan, daw sa, halos nangatuman na. Ug kini tingali, para kaninyo o kanako, tingali’g kini na ang atong kaulahi pang higayon. Tingali’g motaliwan na kita sa dili pa mogabii.

I’ll go with Him, with Him all the way.

I can hear, “Ginakaulaw mo ba Ako ug ang Akong Pulong?”

I can hear my Saviour. . .

²³⁴ Karon hunahuna lang ninyo ha nga nagahigda na kamo nga naghimalatyon na. “Can hear. . .” Kung ingon-ana mahimong ulahi na kana, apan dili pa hinoon karon.

“Take thy cross, and,” mahimong kinahanglan ninyo nga magsakripisyo karon, “follow Me.”

Karon, sa inyong kasingkasing, isulti kini:

I’ll go with Him through the garden,

I’ll go with Him through the garden,

I’ll go with Him through the garden,

I’ll go with Him, with Him all. . .

²³⁵ Karon samtang nagaduko ang atong mga ulo, itaas nato ang atong mga kamot ug moingon:

I’ll go with Him through the judgment,

Karon, mao kana ang nagakahitabo karon mismo, ginahukman Niya kita.

I’ll go. . .

Ginoo, nakaplagan Mo ba ako nga sad-an? Nan, pasayloa ako.

. . . through His judgment,

Unsa ba’y Imong hukom kanako karong buntaga, Ginoo?

. . . with Him through the judg-. . .

Sulayi ako, Ginoo, tan-awa kung aduna ba’y mahugaw’ng butang dinhi kanako.

. . . with Him, with Him all the way.

²³⁶ Amahan, nagapasalamat kami Kanimo karong buntaga tungod sa tanan niining mga kamot. Wala ko’y nakita ni usa ka tawo nga wala nagpataas sa ilang mga kamot. Ginapasalamat ko Ikaw, Ginoo. Ako—nagasalig ko nga Ikaw usab, Ginoo. Wala ni usa nga wala nagpataas sa ilang mga kamot, andam gyud silang mangagi sa paghukom. Hukmi kami, Ginoo. Ug kung aduna ma’y sayup kanamo, pasayloa kami niini, Amahan. Ihatag

kanamo ang Imong kalooy, kay dili namo gustong moatubang sa Imong paghukom pag wala ang kalooy. Mao nga, anaa man ang kalooy karon, busa ginaampo namo, Dios, nga Imo kaming pagahukman ug pasayloon kami sa among mga sala, sumala sa Imong Pulong ug sa Imong saad. Ug itugot nga magkinabuhi kami alang Kanimo sa tanang mga adlaw sa among kinabuhi, nga dili ginakaulaw ang Ebanghelyo.

²³⁷ Karon, Amahan, kung itugot Mo man, pagasugdan namo ang tulo ka sunod-sunod nga mga Dominggo karon, nga mga panagtigum. Andama ang among mga kasingkasing para niana, Ginoo. Andama ako, Oh Dios. Ako mao ang nagatindog nga nagkinahanglan gyud kaayo Kanimo. Nagaampo ako nga Imo akong tultolan ug giyahan ako sa mga butang nga kinahanglan kong buhaton ug igasulti, sa niining umalabot nga mga adlaw.

²³⁸ Tultoli ug giyahi ang bililhon namo nga Igsoong Neville, ang Imong maisogon nga alagad, Ginoo; ug si Igsoong Mann usab, ug ang mga diyakono sa iglesia, ug ang mga tinugyanan, ug ang matag tawo nga nagkatigum dinhi.

²³⁹ Andama kami, Ginoo, aron nga mahimo namo, sa usa—usa ka tinuod nga Cristohanong paagi, nga maghatud og mga makasasala nganha Kanimo, ug maghatud og mga miyembro sa iglesia ngadto sa pagpakaila sa Dios nga among nailhan, nga personal namong nahinagbo, og itugot nga mamahimo nila Siya nga Dios, usab. Karon, Amahan, dili namo mahimo kini, dili namo sila mapasulod. Apan Ikaw, nga Balaang Espiritu, manglihok Ka nganha sa mga tawo, sa mga miyembro sa mga iglesia.

²⁴⁰ Ug maingon sa diyutay'ng nasinati ko uban Kanimo niadtong miaging buntag, “Lumakaw ka ug ikuha ang akong Anak og usa ka Pangasaw-onon. Kuhaa Kini gikan sa mga tawo, gikan sa mga kaiglesiahan. Kuhaa pagawas kana nga Pangasaw-onon.” Tugoti ako, sa pag-ampo karon, Ginoo. Ipadala Mo ang maong Rebekah; og paningkamotan ko nga mamahimong Eliezer. Tabangi ako nga mahimong usa ka kasaligan nga alagad. Ug hinaut nga igapadala sa Dios sa Langit ang Iyang Manulonda sa unahan ko, sa among unahan, aron matigum namo ang maong mga butang ug madala ang Pangasaw-onon nga Iya nang gipili. Amo kining ginapangamuyo sa Ngalan ni Jesus. Amen.

²⁴¹ Karon, pasayloa ko nga medyo napalangan ko kamo. Pasado baynte-singko minutos na. Nahuman ko na unta kini, kaganina pang baynte-singko minutos. Apan, karon, gusto ba ninyo kanang karaang kanta, “Take The Name Of Jesus With You”? [Nagaingon ang kongregasyon, “Amen.”—Ed.] Dili ba maanindot kana? Ginakanta ko kana sulod sa trayntay-tres na ka tuig, ingon nga usa ka pangpauli na nga alawiton. Para pud sa bautismo sa tubig, “On Jordan’s stormy banks I stand.” Ug sa hunahuna ko nga maanindot kini kaayo, “Just take It everywhere you go!”

Precious Name, O how sweet!
 Hope . . . (Karon pagpakiglaman sa inyong mga abay.)
 Precious Name, precious Name, O how sweet!
 Hope of earth and joy of Heaven.

²⁴² Karon hinumdumi baya ninyo ang panerbisyo unyang gabii, alas siete-traynta, sa alas siete-traynta unyang gabii. Karon kantahon nato kining usa ka berso, kita n'yo.

Take the Name of Jesus with you,
 As a shield from every snare;
 When temptations around you . . . (Unsa ma'y inyong buhaton dayon?)
 Just breathe that holy Name in prayer.

Precious Name, O how sweet!
 Hope of earth and joy of Heaven;
 Precious Name, O how sweet!
 Hope of earth and joy of Heaven.

²⁴³ Aduna ba'y mianhi aron magpabautismo pagkahuman niini nga panerbisyo? Kung aduna man, ipataas ang inyong mga kamot. Aduna ba'y magpabautismo? Duha, sige, duha ang magpabautismo pagkahuman dayon niining panerbisyo. Kung ang uban pa kaninyo, si kinsa man kaninyo nga gustong magpabautismo, magpahigayon man pud kita og panerbisyo sa pagbautismo sa kada usa niining mga buluhaton. Ang butang lang nga kinahanglan ninyo nga buhaton mao ang paghangyo. Andam kami aron sa pagbautismo kaninyo. Katungdanan namo kana, nga bautismohan kamo sa Ngalan sa atong Ginoong Jesus Cristo. Katungdanan namo nga buhaton kana. Ug malipay gyud kami nga buhaton kana, sa unsa mang higayon. Kamong mga pagabautismohan, pag-adto lang kamo sa maong mga lawak-ilisanan, pagkahuman dayon sa panerbisyo, ug diretso kita mismo sa pagbautismo sa tubig. Ang si kinsa man nga gustong mosunod kanila, makasigurado kamong ania ra kami . . . kung naghinulsol na kamo sa inyong sala ug inyo nang gidawat si Jesus ingon nga inyong Manluluwas.

²⁴⁴ Dugay ka nang usa ka Cristohanon sulod sa pila na ka tuig, ug wala pa gyud nakita ang Kahayag, ug ang Kahayag sa kagawasan miabot na karon. Ang usa ka babaye, ang usa ka Pangasaw-onon kinahanglan nga dalhon niya ang maong Ngalan! Miingon si Jesus, "Ako mianhi sa Ngalan sa Akong Amahan, ug wala ninyo Ako dawata. Apan aduna ma'y usa nga miabot sa kaugalingon niyang ngalan, ug inyong dawaton siya," mao kana ang inyong denominasyon.

²⁴⁵ Ang si kinsa man nga anak nagaabot sa ngalan sa iyang amahan. Miabot pud ako sa ngalan sa akong amahan. Kamong mga kalalaken-an miabot usab sa ngalan sa inyong amahan.

²⁴⁶ Ug unsa ma'y Iyang Ngalan, unsa man ang Ngalan sa Amahan? Jesus! Siya, “mianhi sa Ngalan sa Akong Amahan, og wala ninyo Ako dawata.” Karon ang Iyang Pangasaw-onon mao gayud ang makabaton sa Iyang Ngalan, siyempre.

²⁴⁷ Gipangasawa ko ang usa ka babaye, nga ginganlan og Broy, ug nahimo na siya nga usa ka Branham.

²⁴⁸ Ngani moanhi Siya alang sa usa ka Pangasaw-onon, siguradoha ninyo ug hinumdumi kana samtang paadto na kamo sa bautismohan.

Iduko nato ang atong mga ulo karon.

²⁴⁹ Ug si Igsoong Vayle dinhi dili na siya estranyo kanato. Usa gayud siya ka bililhon nga igsoon, nakauban ko siya sa daghan na nga mga panagtigum, siya ug ang iyang asawa. Ug siya usab ang manunulat karon sa niining mga wali ug mga ingon-niana nga ginapa-libro. Igsoong Vayle, mahimo mo ba nga ipapauli na kami diha sa pag-ampo, samtang ginaduko nato ang atong mga ulo. [Nagaampo si Igsoong Vayle—Ed.]



PAGKAULAW CEB65-0711
(Ashamed)

Kining Mensahe ni Igsoong William Marrion Branham, unang giwali sa Ingles niadtong Dominggo sa buntag, Hulyo 11, 1965, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2018 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org